

T7972/4469.4(8)

CHINESE - JAPANESE LIBRARY
HARVARD - YENCHING INSTITUTE
AT HARVARD UNIVERSITY

獸

MAR 24 1958

鳥
物
年
華

十三
十四

食物本草卷之十三目錄

獸部 一類

豢畜類 十種

豕

狗

猫

羊

黃羊

牛

馬

驢

騾

駝

哈佛大學
圖書館
珍藏
印

食物本草卷之十三目錄

食物本草卷之十三

元 東垣李杲 編輯

明 瀕湖李時珍 叅訂

獸部

豕畜類

豕

一名猪、一名豚、牝曰豨、牝曰豨、去勢曰豨、凡猪、骨細筋多、高大、有重百餘斤、食物至寡、甚易畜、養之甚易、生息。○李時珍曰、猪天下畜之、而各有異、生青兗、徐淮者耳大、生燕冀者皮厚、生梁雍者足短、生遼東者頭白、生豫州者味短、生江南者耳小、謂之江猪、生嶺南者

食物本草 獸部

白而極肥。豬孕四月而生，在畜屬水，在卦為坎，在禽應室星。

豶猪肉味酸冷，無毒。主狂病久不愈，壓丹石，解熱毒。肥熱人食之，補腎氣，虛竭療水銀風，并中土坑惡邪氣，能閉血脉，弱筋骨，虛人肌不可久食，病人金瘡者尤甚。江猪肉有小毒，多食令人體重，作脯少。有腥氣，豚肉有小毒，久食令人徧體筋肉碎痛，乏氣。○李時珍曰：北猪味薄，煮之汁清；南猪味厚，煮之汁濃，毒尤甚。凡白猪、花猪、孩猪、牝猪、黃臙猪、米猪，並不可食。黃臙煮之汁黃，米猪肉中有米。

說文：豕食於星下則生息米。○合生薑食，生面黥，發風，合蕎麥食，落毛髮，患風病，合葵菜食，少氣，合百花菜，吳茱萸食，發痔疾，合胡荽食，爛人臍，合牛肉食，生蟲，合羊肝雞子，鯽魚豆黃食，滯氣，合龜髓肉食，傷人。凡煮猪肉，得皂莢子、桑白皮、高良薑、黃蠟，不發風氣，得舊籬篾，易熟也。猪頭肉有毒，主寒

熱，五癰鬼毒，同五味煮食，補虛乏氣力，去驚癇，五味下丹石，亦發風氣。有風病者忌食。臘猪頭燒灰，治魚臍瘡，神效。此瘡腫黑，狀狹而長。五月戊辰日

以猪頭祀竈。所求如意。以臘猪耳懸梁上。令人豐足。此亦厭穰之物也。**項肉**俗名槽頭肉主酒積面黃腹

脹。以一兩切如泥。合甘遂末一錢作丸。紙裏煨香

食之酒下。當利出酒布袋也。**脂膏**即油凡凝者為

者為膏味甘微寒無毒。解地膽亭長野葛硫黃毒。為油

諸肝毒。利腸胃。通小便。除五疸水腫。生毛髮。破冷

結。散宿血。利血脉。散風熱。潤肺殺蟲。治皮膚風。塗

惡瘡。治癰疽。悅皮膚。作手膏。不皸裂。胎產衣不下。

以酒多服佳。**鬢膏**生髮悅面。煎膏藥。解斑蝥芫青

毒腦味甘寒。有毒。主風眩腦鳴。凍瘡癰腫。塗紙上

貼之。乾則易。治手足皸裂出血。以酒化洗。并塗之

禮記云。食豚去腦。孫真人食忌云。猪腦損男子陽

道。臨房不能行事。酒後尤不可食。延壽書云。今人

以鹽酒食猪腦。是自引賊也。**髓**味甘寒。無毒。治撲

損惡瘡。塗小兒解顛頭瘡。及臍腫眉瘡。疔疥。服之

補骨髓。益虛勞。按并溪治虛損。補陰丸多用猪脊

髓和丸。取其通腎命。以髓入骨。以髓補髓也。**血味**

鹹平。無毒。主生血。療青豚暴氣。及海外瘴氣。中風

絕傷頭風眩運。及淋瀝卒下血不止。清酒和炒食之。壓丹石。解諸毒。清油炒食。治嘈雜有蟲。服地黃何首烏諸補藥者。忌之。云能損陽也。同黃豆食。滯氣。李時珍曰。按陳自明云。婦人嘈雜。皆血液淚汗變而爲痰。或言是血嘈。多以猪血炒食而愈。蓋以血導血。歸原之意爾。此固一說。然亦有蛇蟲作嘈雜者。蟲得血腥。則飽而伏也。**心血**。調朱砂末服。治驚癇癩疾。又治卒惡死。及痘瘡倒靨。**尾血**。治痘瘡倒靨。用一匙調龍腦少許。新汲水服。又治卒中惡。

死心。味甘鹹平。無毒。治驚邪憂恚。虛悸氣逆。婦人產後中風。血氣驚恐。補血不足。虛劣。多食耗心氣。不可合吳茱萸食。**肝**。味苦溫。無毒。治小兒驚癇。補肝明目。療肝虛浮腫。餌藥人不可食之。合魚鱸食。生癰疽。合鯉魚腸子食。傷人神。合鷓鴣食。生面黥。延壽書云。猪臨殺驚氣入心。絕氣歸肝。俱不可多食。必傷人。**脾**。俗名味澀平。無毒。治脾胃虛熱。同陳橘紅人參生薑葱白陳米煮羹食之。孫思邈曰。凡六畜脾。人一生莫食之。**肺**。味甘微寒。無毒。主補肺。

療肺虛欬嗽。以一具竹刀切片。麻油炒熟。同粥食。又治肺虛嗽血。煮薤薏苡仁末食之。不可與白花菜合食。令人氣滯。發霍亂。八月和飴食。至冬發痘。

腎 俗名腰子 味鹹冷。無毒。主理腎氣。通膀胱。補膀胱水。

臟。暖膝。治耳聾。補虛壯氣。消積滯。除冷利。止消渴。治產勞。虛汗下痢崩中。○腎有虛熱者宜食之。若

腎氣虛寒者非所宜矣。今人不達此意。徃徃食猪腎為補。不可不審。雖補腎。若久食。令人少子。又傷腎。冬月不可食。損人真氣。兼發虛壅。**脛** 音夷。亦作脛。李時珍

曰。一名腎脂。生兩腎中間。似脂非脂。似肉非肉。乃人物之命門。三焦發原處也。肥則多。瘦則少。蓋願養賴之。故謂之願。 味甘平。微毒。其性能去垢膩。染練用之。

脾薄人忌食。治肺痿欬嗽。和棗肉浸酒服。亦治痞癖羸瘦。療肺氣乾脹喘急。潤五臟。去皴皸黧斑。

蝥地膽毒。治冷痢成虛。一切肺病。欬嗽膿血不止。以薄竹筒盛於燂火中煨熟食。上啖之良。通乳汁。

又合膏。練繒帛。**肚** 味甘。微溫。無毒。主補中益氣。止渴斷暴痢。虛弱補虛損。殺勞蟲。釀黃糯米蒸搗為

丸。治勞氣并小兒疳蚘黃瘦病。又主骨蒸熱勞。血

脉不行。補羸助氣。四季宜食。消積聚癥瘕。治惡瘡。
 腸味甘微寒。無毒。治虛渴。小便數。補下焦虛竭。止
 小便。去大小腸風熱。宜食之。潤腸治燥。調血痢臟
 毒。洞腸治人洞腸挺。出血多。脾味甘鹹寒。無毒。治
 夢中遺溺。疝氣墜痛。陰囊濕痒。玉莖生瘡。○李時
 珍曰。猪胞所主。皆下焦病。亦以類從。爾斯有一妓
 病轉脾。小便不通。腹脹如鼓。數日垂死。一醫用猪
 脾吹脹。以翎管安上。插入陰孔。捻脾氣吹入。即大
 尿而愈。此法載在羅天益衛生寶鑑中。知者頗少。

亦機巧妙術也。膽味苦寒。無毒。治傷寒熱渴。骨蒸
 勞極消渴。小兒五疳殺蟲。敷小兒頭瘡。治大便秘
 以葦筒納入下部三寸。灌之立下。通小便。敷惡瘡。
 殺疳。蜜治目赤。目翳。明目清心。臟涼肝脾。入湯沐
 髮。去膩光澤。舌治健脾。補不足。令人能食。和五味
 煮汁食。豚卵味甘溫。無毒。治驚癇癩疾。鬼疰。蠱毒
 除寒熱。賁豚五癰邪氣。攣縮。除陰莖中痛。治陰陽
 易病。少腹急痛。用熱酒吞二枚。即瘥。蹄味甘鹹。小
 寒。無毒。主煮汁服。下乳汁。解百藥毒。洗傷。捷諸敗

食性本草 卷三
瘡滑肌膚去寒熱煮炙通乳脉托癰疽壓丹石煮
清汁洗癰疽瀆熱毒消毒氣去惡肉有效尾用臘
月者燒灰水服治喉痺和猪脂塗赤禿髮落

○附方

治小兒刮腸痢疾禁口閉日至重者精猪肉一兩
薄切炙香以膩粉末半錢鋪上令食或置鼻頭聞
香自然要食也

治風狂歌笑行走不体用豕猪肉一斤煮熟切膾
和醬食或炙粥炒任服之

治禁口痢疾用臘肉脯煨食之妙

治脹滿不食用生猪肉以漿水洗壓乾切膾蒜薤
啖之一日二次下氣去風乃外國奇方也

解丹石毒發熱沉困用肥猪肉五斤葱薤半斤煮
食必腹鳴毒下以水淘之砂石盡乃愈

治傷損不食凡被人打及從高墜下傷重三五日
水食不入口用生猪肉二錢打爛溫水洗去血水
再搗爛以陰陽湯打和以半錢用雞毛送入咽內
却以陰陽湯灌下其食蟲聞香竇開瘀血而上胸

中自然開解此乃損血凝聚心間蟲食血飽他物
蟲不來探故也謂之騙通之法。

治小兒重舌取三家屠肉切指大摩舌上卽愈。

治關格閉塞猪脂薑汁各二升微火煎至一升下
酒五合再煎分三次服效。

治小兒百日內風噤口中有物如蝸牛猪脂擦之
卽消。

治鼠瘦瘰癧用猪膏淹生地黃煎六七沸塗之。

治漏瘡不合以紙粘臘猪脂納瘡中日五夜三次

出。治胞衣不下猪油一兩水一盞煎五七沸服之卽

治漆瘡作痒用猪油頻塗之。

治誤吞鐵釘猪脂多食令飽自然裹出。

治咽喉骨鯁吞猪膏一團不瘥更吞之卽愈。

治雜物入目猪脂煮取水面如油者仰臥去枕點
鼻中不過數度與物俱出。

治發背發乳用猪脂切片冷水浸貼日易四五十
片甚妙此乃急救方。

治骨蒸勞熱。猪脊髓一條。猪胆汁一枚。童便一盞。柴胡前胡胡黃連烏梅各一錢。茱白七根。同煎七分溫服。不過三服。其效如神。

治交接陰毒腹痛欲死。雄猪血乘熱和酒飲之。

治蜈蚣入腹。猪血灌之。少頃飲桐油當吐出。

治痘瘡黑陷。臘月收雄猪心血瓶乾之。每用一錢。

入水片少許。研勻酒服。須臾紅活。無乾血。用生血。

其效如神。

開骨催生丹。用猪心血和乳香末。凡桐子大。硃砂。

為衣。面東酒吞一丸。未下再服。

治卒中惡死。取猪尾血飲。并縛豚枕之。即活。此乃

長桑君授扁鵲法也。出魏夫人傳。

治蛇入七孔。割母猪尾血滴入。即出也。

治心虛自汗不睡者。用雄猪心一个。帶血破開。入

人參當歸各一錢。紫定。煮熟。去藥食之。不過二三

即愈。

治急心疼痛。猪心一枚。每歲入胡椒一粒。同鹽酒

煮食。

治女人陰中作痒炙猪肝納入當有蟲出

治傳尸勞猪腰子一對童子小便二盞無灰酒一

盞新瓷瓶盛之泥封炭火溫養自戌至子時止待

五更初取開飲酒食腰子病篤者一月取效

治夢中遺尿用猪脬洗淨炙食之

治產後遺尿猪脬猪肚各一個糯米半升入脬內

更以脬入肚內同五味煮食

治消渴飲水無度乾猪脬十個剪破去帶燒存性

爲末每服一錢溫酒下

治玉莖生瘡臭爛猪脬一個去尿一半留一半以

煨紅新磚焙乾爲末入黃丹一錢摻之三五次瘡

先以葱椒湯洗患處

治小便不通用猪胆連汁籠住陰頭一二時汁入

自通

治纏喉風閉臘月初一日取猪胆五六个用黃連

青黛薄荷殭蠶白礬朴硝各五錢裝入胆內青紙

包了將地掘一孔深廣各一尺以竹橫懸此胆在

內以物蓋定候至立春日取出待風吹去胆皮青

紙研末密收每吹少許神驗乃萬金不易之方。

治癭瘤大如升斗用猪鬃七枚乃猪喉下肉團一枚大如棗微扁色

紅者是也酒炒入瓶中露一夜取出炙食之神效。

治癰疽發背母猪蹄一隻通草六分綿裹煮羹食之

治男女下疳用母猪糞黃泥包煨存性為末以米泔洗淨搽之立效

治婦人血崩母猪尿燒灰酒服三錢

治小兒陰腫猪屎炒熟袋盛安腫上大效

治竹刺入肉多年燻肉切片包裹之即出

治中諸肝毒猪膏頓服一升

治食髮成癩心腹作痛咽間如有蟲上下嗜食與

油者是也。用猪脂二升酒三升煮三沸服日三次

治喉痺已破瘡口痛者猪腦髓蒸熟入薑醋喫之

即愈

治牙疳危急猪肝一具煮熟蘸赤芍藥末任意食之。後服平胃散二三貼即効

治腎虛遺精多汗夜夢鬼交用猪腎一枚切開去

膜入附子末一錢濕紙裹煨熟空心食之飲酒一盃不過三五服效

治婦人無乳用母猪蹄一具水二斗煮五六升飲之或加通草六分

狗

一名犬。李時珍曰狗類甚多其用有三。田犬長喙善獵吠犬短喙善守食犬體肥供饌。凡本草所用皆食犬也。犬以三月而生在畜屬木在卦屬艮在禽應婁星豺見之跪虎食之醉犬食番木鱉則死物性制伏如此又遼東有鷹背狗乃鷹產三卵一鷹一鵬一犬也。以禽乳獸古所未聞詳見鷹條又有老木之精狀如黑狗而無尾名曰彭侯可以烹食無情化有情精靈之變也

狗肉

黃犬為上黑犬白犬次之

味鹹酸溫無毒主安五臟補絕傷

輕身益氣宜腎補胃氣壯陽道暖腰膝益氣力補

五勞七傷益陽事補血脈厚腸胃實下焦填精髓

和五味煮空心食之凡食犬不可去血則力少不

益人同蒜食損人同菱食生癩白犬合海鮪食必

得惡病道家以犬為地厭不食之凡犬不可炙食

令人消渴妊婦食之令子無聲熱病後食之殺人

服食人忌食九月勿食犬傷神瘦犬有病獠犬發

狂自死犬有毒懸蹄犬傷人赤股而躁者犬目赤

者竝不可食。蹄肉味酸平。主煮汁能下乳汁。血味鹹溫。無毒。用日狗血治癩疾發作。烏狗血治產難橫生血上搶心。和酒服之。補安五臟。熱飲治虛勞吐血。又解射罔毒。點眼治痘瘡入目。又治傷寒熱病。發狂見鬼及鬼擊病。辟諸邪。○李時珍曰。術家以犬禳辟一切邪魅妖術。按史記云。秦時殺狗磔四門以禦災。殺白犬血題門以辟不祥。則自古已然矣。又瑯琊有女子病瘡痒而不痛。華陀殺糠色犬頭向痒處合之。須臾一蛇在皮中動。鈎出而愈。

心血主心痺心痛。取和蜀椒末。九梧子犬。每服五丸。日五服。**乳汁**主十年青盲。取白犬生子目未開時乳。頻點之。狗子目開。卽瘥。赤禿髮落。頻塗甚妙。

脂并脰治手足皴皴。入面脂。去黥黥。柔五金。**腦**主

頭風痺。鼻中瘰肉。下部惡瘡。狗咬傷。取本犬腦

敷之。後不復發。**心**主憂恚氣。除邪。治風痺鼻衄及

下部瘡。狂犬咬。**腎**味平。微毒。治婦人產後腎勞如

瘡者。婦人體熱。用豬腎體冷。用犬腎。**肝**主肝同心

腎。搗塗。狂犬咬。又治脚氣攻心。切生以薑醋進之。

取洩先洩者勿用李時珍曰按沈周雜記云狗肝色如泥土臭味亦然故人夜行土上則肝氣動蓋相感也又張華物類志云以狗肝和土泥竈令婦妾孝順則狗肝應土之說相符矣。**膽**味苦平有小毒主明目敷痂瘍惡瘡療鼻齟鼻中瘕肉主鼻衄聾耳止消渴殺蟲除積能破血凡血氣痛及傷損者熱酒服半箇瘀血盡下治刀箭瘡去腸中膿水又和通草桂為丸服令人隱形○雷斅曰鮭魚插樹立便乾枯狗膽塗之却還榮勝**牡狗陰莖**味鹹

平無毒主傷中陰痿不起令強熱大生子除女子帶下十二疾治絕陽及婦人陰痿補精髓**陰卵**治婦人十二疾燒灰服**皮**治腰痛炙熱黃狗皮暴之頻用取瘡燒灰治諸風**毛**治產難**頸下毛**主小兒夜啼絳囊盛繫兒背上燒灰湯服一錢治邪瘧**尾**燒灰敷犬傷**齒**味平微毒治癩癩寒熱卒風癩伏日取之磨汁治犬疔燒研醋和敷發背及馬鞍瘡同人齒燒灰湯服治痘瘡倒陷有效**頭骨**味甘酸平無毒主金瘡止血燒灰治久痢勞痢和乾薑

若炒見煙爲丸。空心白飲服十九。極效。治癰疽惡瘡。解顱女人崩中帶下。頷骨主小兒諸癩諸瘻。燒灰酒服。骨味甘平。無毒。主燒灰生肌。敷馬瘡。療諸瘡癩。及妬乳癰腫。補虛。理小兒驚癇客忤。米飲日服。治休息久痢。豬脂調敷鼻中瘡。煎汁同米煮粥。補婦人。含有子。

○附方

戊戌酒大補元氣。用黃犬肉一隻。煮一伏時。搗如泥。和汁拌炊糯米三斗。入麴如常釀酒。每日飲之。

治諸骨哽咽。狗涎頻滴骨上。自下。

治大腸脫肛。狗涎抹之。自上也。

治誤吞水蛭。以蒸餅半箇。絞出狗涎。喫之。連食二

三。其物自散。

治肝虛目暗。白犬膽一枚。螢火虫二十七枚。陰乾爲末。點之。

治產後血亂奔入四肢。并違墮。以狗頭骨灰。酒服二錢。甚効。

治打損接骨。狗頭一箇。燒存性爲末。熱醋調塗。暖

卧。

治附骨疽瘡。狗頭骨燒烟。日熏之。

治惡瘡不愈。狗頭灰同黃丹末等分敷之。

治夢中洩精。狗頭鼻梁骨燒研。卧時酒服一錢。

猫

一名家狸。捕鼠小獸也。處處畜之。有黃黑白
駁數色。狸身而虎面。柔毛而利齒。以尾長腰
短。目如金銀。及上齧多稜者為良。或云其睛
可定時。子午卯酉如一線。寅申巳亥如滿月
辰戌丑未如棗核也。其鼻端常冷。惟夏至一
日則暖。性畏寒而不畏暑。能晝地卜食。隨月
旬上下嚙鼠首尾。皆與虎同。陰類之相符如
此。其孕也。兩月而生。一乳三四子。恒有自食
之者。俗傳牝猫無牡。但以竹筴掃背數次。則
孕。或用斗覆猫於竈前。以刷帚頭擊斗。祝竈

神而求之。亦孕。此與以雞子祝竈而抱雛者
相同。俱埋之。不可推者也。猫有病。以烏藥水
灌之。甚良。世傳薄荷醉猫
死猫引竹。物類相感然耳。

猫肉味甘酸溫。無毒。治勞瘵鼠癭。蠱毒。○李時珍曰。

本草以猫狸為一類。註解然狸肉入食。猫肉不佳。

亦不入食品。故用之者稀。胡澗易簡方云。凡預防

蠱毒。自少食猫肉。則蠱不能害此。亦隋書所謂猫

鬼野道之蠱乎。肘后治鼠癭核腫。或已潰出膿血

者。取猫肉如常作羹。空心食之。云不傳之法也。昔

人皆以癩子為鼠涎毒所致。此乃淮南子所謂狸

頭治癩。及鼠嚙人瘡。又云狐目狸腦。鼠去其穴。皆取其相制之義耳。頭骨味甘溫。無毒。治鬼疰。蠱毒。心腹痛。殺蟲。治疔。及痘瘡變黑。癩癧癩瘰惡瘡。腦主癩癧鼠瘻潰爛。同莽草等分爲末。納孔中。眼睛主癩癧鼠瘻。燒灰并華水服方寸匕。日三。牙治小兒痘瘡倒靨欲死。同人牙豬牙犬牙燒炭等分。研末蜜水服一字。即便發起。舌主癩癧鼠瘻。生晒研。一具。生晒研末。每朔望五更酒調服之。胞衣治反胃吐食。燒灰入硃砂末少許。壓舌下甚效。

○附方

治貓鬼野道病。歌哭不自由。臘月死貓頭燒灰。水服一錢七。日二。

治多年癩癧不愈。用貓頭蝙蝠各一個。俱撒上黑荳。同燒存性。爲末。摻之。乾則油調。內服五香連翹湯取効。

治走馬牙疳。黑貓頭燒灰。酒服方寸匕。

治對口毒瘡。貓頭骨燒存性。研。每服三五錢。溫酒

送下。

羊

牲名穀，牝名辨去勢曰羯，河西者佳，河東者亦好。若驅至南方，則筋力自勞，損安能補益。人今南方年多食野草毒草，故江浙羊少味而發疾，南人食之即不憂也。惟淮南州郡或有佳者，可亞北羊。北羊至南方一二年亦不中食，何況於南羊。蓋土地使然也。寇宗奭曰：殺灘羊出陝西河東，尤狠健，毛最長而厚，入藥最佳。如供食，則不如北地無角白大羊也。又同華之間有小羊，供饌在諸羊之上。○李時珍曰：生江南者為吳羊，頭身相等而毛短。生秦晉者為夏羊，頭小身大而毛長。土人二歲而剪其毛，以為種物，謂之綿羊。廣南英州一種，名之羊，食仙茅，極肥，無復血，肉之分，食之甚補人。諸羊皆孕四月而產，其日無神，其腸薄而紫曲，在畜屬水，故湯繁而性熱也。在卦屬兌，故外柔而內剛也。其性惡濕，喜燥，食鈞

吻而肥，食仙茅而肪，食仙靈脾而淫，食躑躅而死。物理之宜忌不可測也。契丹以其骨占灼，謂之羊卜，亦有一靈耶。其皮極薄，南番以書字。吳人以畫采為燈，又哈密大食諸番有大尾羊，細毛薄皮，尾上旁廣，重一二十斤，行則以車載之。唐書謂之靈羊，云可療毒。又有一種，名胡羊，高三尺餘，其尾如扇，每歲春月割取脂，再縫合之，不取則脹死。水東日記云：莊浪衛近雪山，有鬻羊土人，歲取其脂，不久復滿。又臨洮諸地出洮羊，大者重百斤。廣志云：西域驢羊大如驢，即此類也。又有犖羊，出西北諸地，其皮蹄可以割黍，一種封羊，其背有肉封如駝，出涼州郡縣，亦呼為駝羊。又一種地生羊，出西域，劉有出使西域記云：以羊臍種於土中，溉以水，聞雷而生。臍臍與地連，及長，驚以木聲，臍乃斷，便能行。鬻艸至秋可食。臍內復有種，名龍種羊。段公路北戶錄云：大秦國有地生羊，其羔生土中，國人築墻圍之。

臍與地連，割之則死，但走馬擊鼓以駭之，驚鳴臍絕，便逐水草。吳策淵穎集云：西域地生羊，以脛骨種土中，聞雷聲則羊子從骨中生。走馬驚之，則臍脫也。其皮可為褥。一云：漠北人種羊角而生，大如兔而肥美。案是三說，知含靈有識之物，不繇交感孕育而資灌溉栽培造化之機，微哉！妙哉！又有羴羊，土之精也。其肝土也，但有雌雄，不食水草。季極子曾掘土得之，又千歲樹精，亦為青羊。

羊肉味苦甘，大熱無毒，主暖中，字乳餘疾，及頭腦大。

風汗虛勞寒冷，補中益氣，安心止驚，止痛，利產婦。

治風眩瘦病，丈夫五勞七傷，小兒驚癇，開胃健力。

○李時珍曰：熱病及天行病瘧疾，病後食之，必發。

熱致危，妊婦食之，令子多熱。白羊黑頭黑羊白頭。

獨角者，竝有毒，食之生癰。禮曰：羊毳毛而毳者，羴。

又云：煮羊以杏仁，或瓦片則易糜，以胡桃則不燥。

以竹鬪則助味。中羊毒者，飲甘草湯則解。銅器煮。

之，男子損陽，女子暴下，物性之異如此，不可不知。

同蕎麥，豈醬食，發痼疾，同醋食之，人心。○時珍又。

曰：按開河記云：隋大總管麻叔謀疾風逆，不坐不。

得，煬帝命太醫令巢元方視之，曰：云入腠理，病在。

胃臆，須用嫩肥羊蒸熟，搽藥食之，則瘥如其言。未。

盡劑而痊。自後每殺羊羔。同杏酪五味。日食數枚。觀此則羊肉補虛之功。益可證矣。○寇宗奭曰。仲景治寒疝。羊肉湯服之。無不驗者。一婦冬月生產。寒入子戶。腹下痛不可按。此寒疝也。醫欲投抵當湯。予曰。非其治也。下以羊肉湯。卽愈。李杲曰。羊肉有形之物。能補有形肌肉之氣。故曰補可去弱。人參羊肉之屬。人參補氣。羊肉補形。凡味同羊肉者。皆補血虛。蓋取陽生陰長之義耳。頭蹄味甘平無毒。治風眩瘦疾。小兒驚癇。腦熱頭眩。安心止驚。絞

中止汗補胃。治丈夫五勞骨熱。熱病後宜食之。冷病人勿多食。療腎虛精竭。皮治一切風。及脚中虛風。補虛勞。去毛作羹。臠食。溼皮臥之。散打傷青腫。乾皮燒服。治蠱毒下血。脂味甘熱無毒。主生脂。止下痢。脫肛。去風毒。產後腹中絞痛。治鬼產。去游風。及黑黥熟脂。主賊風痿痺。飛尸辟溫氣。止勞痢。潤肌膚。殺蟲。治瘡癬。入膏藥。透肌肉。經絡。徹風熱毒。氣血味鹹平無毒。治女人血虛中風。及產後血悶欲絕者。熱飲一升。卽活。治產後血攻。下胎衣。治卒

驚九竅出血。解莽草毒。胡蔓草毒。又解一切丹石毒發。○李時珍曰。外臺云。凡服丹石人忌食羊血。十年一食。前功盡亡。此物能制丹砂水銀輕粉。生銀礪砂砒霜硫黃乳。石鍾乳空青曾青雲母石陽起石孔公孽等毒。凡覺毒發。刺飲一升。卽解。又服地黃何首烏諸補藥者。亦忌之。嶺表錄異言其能解胡蔓草毒。羊血解毒之功用如此。不可不知。又按夏子益竒疾方云。凡猪羊血久食。則鼻中毛出。晝夜長五寸。漸如繩。痛不可忍。摘去復生。惟用乳

石礪砂等分爲丸。臨臥服十丸。自落也。乳味甘溫。無毒。主補寒冷虛乏。潤心肺。治消渴。療虛勞。益精氣。補肺腎氣。如小腸氣。合脂作羹。補腎虛。及男女中風。利大腸。治小兒驚癇。含之。治口瘡。主心卒痛。可溫服之。又蚰蜒入耳。灌之。卽化成水。治大人乾嘔及反胃。小兒噤吮及舌腫。並時時溫飲之。解蜘蛛咬毒。○劉禹錫傳信方云。有人爲蜘蛛咬腹。大如妊。徧身生絲。其家棄之。乞食。有僧教啖羊乳。未幾疾平也。腦有毒。入面脂手膏。潤皮膚。去黥黯。塗

損傷丹瘤肉刺發風病。和酒服。迷人心。成風疾。男子食之損精氣。少子。白羊黑頭食其腦作腸癰。髓味甘溫無毒。主男子女人傷中。陰陽氣不足。利血脉。益經氣。以酒服之。却風熱。止毒。久服不損人。和酒服補血。主女人血虛風悶。潤肺氣。澤皮毛。滅癥痕。心味甘溫無毒。止憂恚。膈氣補心。有孔者殺人。肺主補肺。止欬嗽傷中。補不足。去風邪。治渴止小便數。同小荳葉煮食之。通肺氣。利小便。行水解毒。自三月至五月。其中有蟲。狀如馬尾。長二三寸。須

去之。不去令人痢下。腎主補腎氣虛弱。益精髓。補腎虛耳聾陰弱。壯陽益胃。止小便。治虛損盜汗。合合脂作羹。療勞痢甚効。蒜薤食之一升。療癥瘕。治腎

虛消渴。羊石子即羊外腎也主腎虛精滑。肝味苦寒無

毒。主補肝。治肝風虛熱。目赤暗痛。熱病後失明。並用子肝七枚。作生食。神効。亦切片水浸貼之。解蠱毒。合猪肉。及梅子小荳食。傷人心。合生椒食。傷人五臟。最損小兒。合苦荀食。病青盲。妊婦食之。令子多厄。按三元延壽書云。凡治目疾。以青羊肝為佳。

有人年八十餘。瞳子瞭然。夜讀細字。云別無服藥。但自小不食畜獸肝耳。或以本草羊肝明目而疑之。蓋羊肝明目。性也。他肝則否。凡畜獸臨殺之時。忿氣聚于肝。肝之血。不利于目。宜矣。膽味苦寒。無毒。主青盲明目。點赤障白翳風淚眼。解蠱毒。療疴溼時行熱癩瘡。和醋服之良。治諸瘡。能生人身血脈。同蜜蒸九次。點赤風眼有效。胃即羊肚味甘溫。無毒。主胃反。止虛汗。治虛羸。小便數。作羹食三五。瘥羊肚和飯飲。久食。令人多唾清水。成反胃。作噎病。

肝主下虛遺溺。以水盛入炙熟。空腹食之。四五次愈。脰主潤肺燥。諸瘡瘍。入面脂。去黥黥。澤肌膚。滅癍痕。舌主補中益氣。正要用羊舌二枚。羊皮二具。羊腎四枚。麝菰糟薑作羹肉汁食之。睛主目赤及翳膜。曝乾為末。點之。熟羊眼中白珠二枚。于細石上。和棗核磨汁點目。翳羞明。頻用三四日瘥。筋主塵物入目。熟嚼納背中。仰臥即出。殺羊角味鹹溫。無毒。主青盲明目。止驚悸。寒洩。久服安心益氣。輕身殺疥蟲。入山燒之。辟惡鬼。虎狼療百節中結氣。

風頭痛及蠱毒吐血婦人產後餘痛燒之辟蛇灰
治漏下退熱主山瘴溪毒齒味温主小兒羊痢寒

頭骨

已下並用
殺羊者良

味甘平無毒主風眩瘦疾小兒驚

癩脊骨味甘熱無毒主虛勞寒中羸瘦補腎虛通

督脉治腰痛下痢尾骨主益腎明目補下焦虛冷

脛骨味甘温無毒主虛冷勞脾弱腎虛不能攝精

白濁除溼熱健腰脚固牙齒去黧黯治誤吞銅鐵

毛主轉筋醋煮裹脚鬚主小兒口瘡蠹蝮尿瘡燒

灰和油敷

○附方

羊肉湯治產後寒勞虛羸心腹痠痛用肥羊肉一
斤水一斗煮汁八升入當歸五兩黃芪八兩生薑
六兩煮取二升分四服此張仲景方也

治女子虛怯絕孕帶下赤白用羊肉二斤香豉大

蒜三兩水一斗煮五升納酥一兩更煮二升服

治五勞七傷虛冷之症用肥羊肉一腿密蓋煮爛

絞取汁服并食肉

治骨蒸久冷羊肉一斤山藥一斤各爛煮如泥下

米煮粥食之。

治骨蒸傳尸。用羊肉一拳大。煮熟。皂莢一尺。炙以無灰酒一升。銅鐺內煮三五沸。去滓。入黑錫一兩。令病人先啜肉汁。乃服一合。當吐蟲如馬尾爲效。

治衄血不止。熱羊血飲之。卽瘥。

治胎死不出。及胞衣不下。飲羊血一小盞效。

治誤吞蜈蚣。刺猪羊血灌之。卽吐出。昔有店婦吹火筒中有蜈蚣入腹。店婦仆地號叫可畏。道人劉復真用此法而愈。

治漆瘡作痒。羊乳敷之。

治遍身丹癩如火。羊腦同朴硝研塗之。

治肺痿骨蒸已極。他方莫效者。用煉羊脂煉羊髓各五兩。煎沸。下煉蜜及生地黄汁各五合。生薑汁一合。不住手攪。微火熬成膏。每日空心溫酒調服一匙。

治腎虛精竭。羊腎二隻。切碎。於豉汁中。以五味同白梁米糝作羹粥食。

治五勞七傷。陽虛無力。羊腎一對。去脂切碎。肉蓯

蓉一兩。酒浸一夕。去皮和作羹。下葱鹽五味食。又方治陽氣衰敗。腰脚疼痛。用羊腰子三對。羊肉半斤。葱白一莖。枸杞葉一斤。同五味煮成汁。下米作粥食之。

治青盲內障。羊肝一個。黃連一兩。熟地黃二兩。同搗丸。梧子大。日三服。每服七十九。食遠茶下。崔承元病內障喪明。有人惠此方報德。服之遂明。

治婦人陰戶有蟲作痒。羊肝納入引出。

治虛勞白濁。羊骨為末。酒服方寸七日三服。大效。

治瘡口不合。膿水不止成漏。用小羊

初生者

脊骨。鹽

泥固濟煨過研末五錢。入麝香雄黃末各一錢。填瘡口。三日外必合。

治誤吞銅錢。用羊脛骨燒灰。以煮稀粥食之。神效。

李時珍曰。羊脛骨灰。可以磨鏡。羊頭骨可以消鐵。

漢上張成忠女。誤吞金釧一隻。胸膈痛不可忍。憂

惶無措。一銀匠炒末藥三錢。米飲服之。次早大便

取下。叩求其方。乃羊脛骨灰一物耳。按此方乃巧

哲格物究理之妙也。

治女人月水不斷。用羊前左脚脛骨一條。紙裹泥封。令乾煨赤。入椶櫚灰等分。每一錢溫酒下。

治面生黧黯醜惡。皮厚驚黑。用羊脛骨灰。雞子白和敷。夜塗旦洗。洗以白梁米泔。三日膩白好顏。

治咽喉骨鯁。羊脛骨灰。米飲服一錢。

治羊鬚疔生頰下。浸淫水出。痛痒不一。久不能痊。

用牡羊鬚。荆芥乾。棗肉各二錢。燒存性。入輕粉半

錢。米泔水洗拭。清油調搽。二三次必愈。

治瘰癧已破。久不生肌。用羊屎煨五錢。杏仁燒五

錢。研末。豬骨髓調搽。

治崩中垂死。肥羊肉三斤。水二斗。煮一斗三升。入

生地黃一升。乾薑當歸三兩。煮三升。分四服。

治小兒嗜土。買市中羊肉一斤。令人以繩繫于地

上。拽至家洗淨。炒炙食。或煮汁亦可。

治婦人陰脫。剪羊脂頻塗之。

黃羊

黃羊出關西。西番及桂林諸處。有四種。狀與羊同。但氏小細。肋腹下帶黃色。角似羖

羊。喜臥。炒地。生沙漠。能走善臥。獨居。而尾黑者。名黑尾黃羊。生野草內。或羣至數十者。名

曰黃羊。生臨洮諸處。甚大而尾似麋鹿者。名洮羊。其皮皆可為裘。得出南方桂林者。則深

獸部

毛

褐色黑脊白斑
與鹿相近也

黃羊肉味甘溫無毒主補中益氣治勞傷虛寒髓主

補益功同羊髓

牛

李時珍曰牛有犛牛水牛三種犛牛小水牛大犛牛有黃黑赤白駁雜數色水牛色青蒼大腹銳頭其狀類豬角若樞牙能與虎鬪亦有白色者牛齒有下無上察其齒而知其年三歲二齒四歲四齒五歲六齒六歲以下每年接脊骨一節牛耳聾其聽以鼻牛瞳豎而不橫其聲曰牟項垂曰胡蹄肉曰躡百葉曰脰用胎曰腮鼻木曰奉嚼草復出曰齧腹草未化曰聖羴牛在畜屬土在卦屬坤土緩而和其性順也造化權輿云乾陽為馬坤陰為牛故馬蹄圓牛蹄拆馬病則卧陰勝也牛病則立陽勝也馬起先前足卧先後足從陽也

牛起先後足臥
先前足從陰也

黃牛肉味甘溫無毒主安中益氣養脾胃補益腰脚

止消渴及唾涎黃牛肉微毒食之發藥毒動病人

不如水牛○孟詵曰黃牛動病黑牛尤不可食牛

者稼穡之資不可多殺若自死者血脈已絕骨髓

已竭不可食之○陳藏器曰牛病死者發痼疾疰

癖令人洞下疰病黑牛白頭者不可食獨肝者有

大毒令人痢血死北人牛瘦多以蛇從鼻灌之故

肝獨也水牛則無之○李時珍曰張仲景云噉蛇

牛毛髮白而後順者是也。人乳可解其毒。內則云。牛。夜。鳴。則。瘡。臭。不。可。食。病。死。者。有。大。毒。令。人。生。疔。暴。亡。食。經。云。牛。自。死。白。首。者。食。之。殺。人。疥。牛。食。之。發。痒。黃。牛。水。牛。肉。合。豬。肉。及。黍。米。酒。食。竝。生。寸。白。蟲。合。韭。薤。食。令。人。熱。病。合。生。薑。食。損。齒。煮。牛。肉。入。杏。仁。蘆。葉。易。爛。相。宜。○孟。詵。曰。惡。馬。食。牛。肉。卽。馴。亦。物。性。也。○李。時。珍。曰。韓。懋。言。牛。肉。補。氣。與。黃。芪。同。功。觀。丹。溪。朱。氏。倒。倉。法。論。而。引。申。觸。類。則。牛。之。補。土。可。心。解。矣。今。天。下。日。用。之。物。雖。嚴。法。不。能。禁。

亦。因。肉。甘。而。補。皮。骨。有。用。也。朱。丹。溪。倒。倉。論。曰。腸。胃。爲。積。穀。之。室。故。謂。之。倉。倒。者。推。陳。以。致。新。也。胃。屬。土。受。物。而。不。能。自。運。七。情。五。味。有。傷。中。宮。停。痰。積。血。互。相。纏。糾。發。爲。癱。瘓。爲。勞。瘵。爲。蠱。脹。成。形。成。質。爲。窠。爲。目。以。生。百。病。而。中。宮。愆。和。自。非。丸。散。所。能。去。也。此。方。出。西。域。異。人。法。用。黃。肥。牡。牛。肉。二。十。斤。長。流。水。煮。成。糜。去。滓。濾。取。液。再。熬。成。琥。珀。色。收。之。每。飲。一。鍾。隨。飲。至。數。十。鍾。寒。月。溫。飲。病。在。上。則。令。吐。在。下。則。令。利。在。中。則。令。吐。而。利。在。人。活。變。吐。

利後。渴卽服其小便一盞。亦可蕩滌餘垢。睡二日。乃食淡粥。養半月。卽精神強健。沉痾悉亡也。須五年忌牛肉。蓋牛坤土也。黃土色也。以順德配乾。牡之用也。肉者。胃之樂也。熟而爲液。無形之物也。故能由腸胃而透肌膚。毛竅。爪甲。無所不到。在表者。因吐而得汗。在清道者。自吐而去。在濁道者。自利而除。有如洪水泛漲。陳莖順流而去。盎然溟然。潤澤枯槁。而有精爽之樂也。○王綸云。牛肉本補脾胃之物。非吐下藥也。特飲之。旣滿而溢。爾借補

爲瀉。故病去而胃得補。亦奇法也。但病非腸胃者。似難施之。水牛肉味甘平無毒。消渴止嘔。洩安中。益氣養脾胃。補虛壯健。強筋骨。消水腫。除濕氣。宜忌同黃牛。頭蹄味涼。治下熱風。鼻主消渴。同石燕。煮汁服。治婦人無乳。作羹食之。不過兩日。乳下無限。氣壯人尤効。療口眼喎斜。不拘乾濕者。以火炙熱於患處熨之。卽漸止。皮治水氣浮腫。小便澀少。以皮蒸熟。切入豉汁食之。熬膠最良。乳味甘微寒。無毒。主補虛羸。止渴。養心肺。解熱毒。潤皮膚。冷補。

下熱氣。和蒜煎沸食。去冷氣。痲痺。患熱風人宜食之。老人煑食有益。入薑葱。止小兒吐乳。補勞。治反胃熱噦。補益勞損。潤大腸。治氣痢。除疸黃。老人煑粥甚宜。○朱丹溪曰。反胃噎膈。大便燥結。宜牛羊乳時時噉之。並服四物湯爲上策。不可用人乳。人乳有飲食之毒。七情之火也。○李時珍曰。乳煎芰。治痢有效。蓋一寒一熱。能和陰陽耳。按獨異志云。唐太宗苦氣痢。衆醫不效。下訪詔問金吾長張寶藏。曾困此疾。卽具疏以煎芰方上。服之立愈。

宣下宰臣與五品官。魏徵難之。逾月不擬。上疾復發。復進之。又平。因問左右曰。進方人有功。未見除授。何也。徵懼曰。未知文武二吏。上怒曰。治得宰相不妨授三品。我豈不及汝耶。卽命與三品文官。授鴻臚寺卿。其方用牛乳半斤。芰三錢。同煎減半。空腹頓服。血味鹹平。無毒。主解毒利腸。治金瘡折傷垂死。又下水蛭。煑拌醋食。治血痢便血。脂味甘。溫微毒。治諸瘡疥癬白禿。亦入面脂。多食令人發痼疾瘡瘍。髓味甘溫無毒。主補中填骨髓。久服增

年安五臟。平三焦。續絕傷。益氣力。止洩利。去消渴。皆以清酒暖服之。平胃氣。通十二經脈。治瘦病。以黑牛髓。地黃汁。白蜜等分煎服。潤肺補腎。澤肌悅面。理折傷。擦損痛甚妙。**腦**味甘溫微毒。治風眩。消渴。脾積痞氣。潤皴裂。入面脂用。牛熱病死者。勿食。其腦令人生腸癰。**心**治虛忘。補心。**脾**主補脾。臘月淡煮。日食一度。治痔瘻。和朴硝作脯食。消痞塊。**肺**主補肺。**肝**主補肝明目。治瘧及痢。醋煮食之。婦人陰蠱。納之引蟲。**腎**主補腎氣。益精。治濕痺。**胃**味甘

溫無毒。主消渴風眩。補五臟。醋煮食之。補中益氣。

解毒養脾胃。**脆**一名百葉。牛羊食百草。與他獸異。故其胃有脆。有眩。有蜂窠。亦與他

獸異也。眩。即胃之厚處。治熱氣水氣。治痢。解酒毒。藥毒。丹石

毒。發熱。同肝作生。以薑醋食之。**膽**味苦大寒無毒。

可丸藥。除心腹熱渴。止下痢。及口焦燥。益目精。臘

月釀槐子服明目。治疝濕。彌佳。釀黑豆百日後。取

出。每夜吞一枚。鎮肝明目。釀南星末陰乾。治驚風

有奇功。除黃殺蟲。治癰腫。喉。治小兒呷氣。療反胃

吐食。取一具去膜及兩頭。逐節以醋浸炙燥。燒存

性每服一錢。米飲下神效。醫治喉痺氣癭。古方多用之。**齒**治小兒牛癩。○李時珍曰。六畜齒治六癩。皆比類之義也。耳珠先生有固牙法。用牛齒三十枚。瓶盛固濟。煨赤為末。每以水一盞。末二錢煎熟。含漱。冷則吐去。有損動者。以末揩之。此亦以類從也。**牛角**即角尖中堅骨也。味苦温無毒。治下閉血。瘀血。疼痛。及女人帶下血。燔之酒服。燒灰主赤白痢。黃牛者。燒之主婦人血崩。大便下血。血痢。水牛者。燒之止婦人血崩。赤白帶下。冷痢瀉血。水洩。治水腫。

角味苦寒無毒。水牛者燔之。治時氣寒熱頭痛。煎汁治熱毒風及壯熱。犂牛者治喉痺腫塞欲死。燒灰酒服一錢。小兒飲乳不快似喉痺者。取灰塗乳上。嚥下即瘥。治淋破血。**骨**味甘温無毒。燒灰治吐血鼻洪。崩中帶下。腸風瀉血。水瀉。治邪瘧。燒灰同豬脂塗。疔瘡。蝕人。口鼻有效。**蹄甲**治婦人崩中漏下。赤白。**燒灰水**服治牛癩。和油塗。臙瘡。研末貼臙。止小兒夜啼。陰莖。治婦人漏下。赤白無子。貼牛卵囊。治疝氣。一具煮爛。入小茴香鹽少許。拌食。**毛**臙。

毛治小兒久不行耳毛尾毛陰毛竝主通淋閉口
 涎治反胃嘔吐水服二匙終身不噎吮小兒治客
 忤灌一合治小兒霍亂入鹽少許頓服一盞治喉
 閉口噤鼻津治小兒中客忤水和少許灌之又塗
 小兒鼻瘡及濕癬耳垢治蛇傷惡毒治癰腫未
 成膿封之即散疔蟲蝕鼻生瘡及毒蛇螫人竝敷
 之溺味苦辛微溫無毒治水腫腹脹脚滿利小便
 屎味苦寒無毒治水腫惡氣乾者燂之敷鼠瘻惡
 瘡燒灰敷灸瘡不瘥敷小兒爛瘡爛痘及癰腫不

合能滅癥痕絞汁治消渴黃痺脚氣霍亂小便不
 通黃犢子臍皮治九竅四肢指岐間血出乃暴怒
 所為燒此末水服寸七日四五服良主中惡霍亂
 及鬼擊吐血以一升和酒三升煮汁服聖葶治食
 牛肉作脹解牛肉毒○李時珍曰按劉恂嶺表錄
 異云廣之容南好食水牛肉或炮或炙食訖即啜
 聖葶消之調以薑桂鹽醋腹遂不脹聖葶如青苔
 狀乃牛腸胃中未化草也治草一名牛絞汁服止
 噎療反胃霍亂小兒口噤風鼻塞即穿鼻木也木拳主

小兒癩。治消渴煎汁服。或燒灰酒服。草拳燒研。傳小兒鼻下瘡。燒灰吹。纏喉風甚効。

○附方

治癬積。用黃牛肉一斤。恒山三錢。同煮熟。食肉飲汁。癬必自消。立効。

治肉人怪病。人頂生瘡。五色如櫻桃狀。破則自頂分裂。連皮剝脫至足。名曰肉人。常飲黃牛乳。即自消也。

治誤吞水蛭。腸痛黃瘦。牛血熱飲一二升。次早化

豬脂一升。飲之。即下出也。

治臙瘡不斂。牛胞衣一具。燒存性。研搽。

治卒魘不寤。以青牛蹄。或馬蹄。置人頭上。少頃即

活

治損目破睛。牛口涎。日點二次。避風。黑睛破者。亦

瘥

治胎死腹中。用濕牛糞塗腹上。即下。

治惡犬咬傷。洗淨。以熱牛屎封之。即時痛止。

馬李時珍曰。馬以雲中者為良。雲中。今大同府也。大抵馬以西北方者為勝。東南者劣。弱不

及馬應月，故十一月而生，其年以齒別之。在畜屬火，在辰屬午，或云在卦屬乾，屬金。馬之眼光照人全身者，其齒最少，光愈近，齒愈大。馬食杜衡善走，食稻則足重，食鼠屎則腹脹。食雞糞則生骨眼，以僵蚕烏梅拭牙，則不食。得桑葉乃解，掛鼠狼皮于槽，亦不食。遇侮馬骨，則不行，以豬槽飼馬，石灰泥馬槽，馬汗着門，並令馬落駒，繫獼猴于廐，辟馬病，皆物理之當然耳。

白馬肉味辛苦，冷有毒，治傷中除熱下氣，長筋骨，強腰脊，壯健強志，輕身不肌，作脯治寒熱痿痺，煮汁洗頭瘡，白禿只堪煮，餘食難消，漬以清水，搗洗血盡，乃煮，不然則毒不出，患疔腫，或曰以冷水煮之。

不可蓋釜。○馬生角，馬無夜眼，白馬青蹄，白馬黑頭者，並不可食，令人癩。馬鞍下肉色黑，及馬自死者，並不可食，殺人。馬黑脊而斑臂者，並不可食。○蕭炳曰：患痢生疥，人勿食，必加劇。妊婦食之，令子過月，乳母食之，令子疳瘦。○孟詵曰：同倉米蒼耳食，必得惡病，十有九死。同薑食，生氣嗽。同豬肉食，成霍亂。食馬肉毒，發心悶者，飲清酒則解，飲濁酒則加。○陶弘景曰：秦穆公云：食駿馬肉，不飲酒，必殺人。○李時珍曰：食馬中毒者，飲蘆朮汁，食杏仁。

可解鬢膏

鬢項上也

味甘平。有小毒。生髮。治面黥。手足

皴粗。入脂澤用。療偏風。口喎僻。乳味甘冷。無毒。止

渴。治熱。作酪。性溫。飲之。消肉。○孫思邈曰。性冷利。

同魚鱸。食作瘕。心治喜忘。患痢人。食馬心。則痞悶。

加甚。肘后方。治心昏多忘。牛馬豬雞心。乾之為末。

酒服。方寸匕。日三。則聞一知十。肺治寒熱。小兒莖

萎。肝主有大毒。○陶弘景曰。馬肝及鞍下肉。殺人。

○李時珍曰。按漢武帝云。食肉母。食馬肝。又云。文

成。食馬肝而死。韋莊云。食馬留肝。則其毒可知矣。

方家以豉汁鼠矢解之。腎李時珍曰。按熊太古薰

集云。馬有墨在腎。牛有黃在膽。造物之所鍾也。此

亦牛黃狗寶之類。當有功用。惜乎前人不知。漫記

於此。以俟。白馬陰莖。味甘鹹平。無毒。治傷中絕脉。

陰不起。強志益志。長肌肉。肥健生子。小兒驚癩。益

丈夫陰氣。駒胞衣。治婦人天癸不通。煨存性。為末。

每服三錢。入麝香少許。空服。新汲水下。不過三服。

良眼。味平無毒。治驚癩腹滿。瘧疾。小兒疔痛。與母

帶之。夜眼。在足膝上。馬有此能夜行。故名。治卒死尸厥。齩齒痛。牙

獸部

齒味甘平。有小毒。治小兒馬癩。水摩服。燒灰唾和。塗癰疽。丁腫。出根効。**骨**味有毒。燒灰和醋。敷小兒頭瘡。及身上瘡。止邪瘧。燒灰和油。敷小兒耳瘡。頭瘡。陰瘡。癩疽。有漿如火灼。敷乳頭。飲兒止夜啼。頭骨味甘微寒。有小毒。治喜眠。令人不睡。燒灰水服。方寸七。日三夜一。作枕亦良。治齒痛。燒灰敷頭耳瘡。療馬汗氣入瘡。痛腫。燒灰敷之。白汗出良。**脛骨**味甘寒。無毒。煨存性。降陰火。中氣不足者用之。可代黃芩黃連。**懸蹄**味甘平。無毒。治驚邪。瘕癥。乳難。

辟惡氣。鬼毒。蠱症。不祥。止衄。內漏。齧齒。赤馬者治赤崩。白馬者治白崩。主癩癩。齒痛。療腸癰。下瘀血。帶下。殺蟲。又燒灰入鹽少許。搽走馬疳。蝕甚良。赤馬者辟瘟瘧。皮治婦人臨產。赤馬皮催生良。治小兒白禿。以赤馬皮白馬蹄。燒灰和臘豬脂敷之良。**鬣毛**即鬣也。一名鬣。性有毒。治小兒驚癩。女子崩中。赤白燒灰服。止血。塗惡瘡。**尾**治女人崩中。小兒客忤。**腦**性有毒。治斷酒。臘月者溫酒服之。**血**性有大毒。○孟詵曰。凡生馬血。入人肉中。一二日便腫起。連心。

即死。有人剝馬傷手。血入肉一夜致死。汗有大毒。

○陶弘景曰。患瘡人觸馬氣。馬毛馬尿。馬屎者。並

令加劇。○孟詵曰。馬汗入瘡。毒攻心欲死者。燒粟

幹灰淋汁浸洗。出白沫。乃毒氣也。嶺南有人用此

得力。白馬溺。味辛微寒。有毒。主消渴。破癥。堅積聚。

男子伏梁積疝。婦人瘦積。銅器承飲之。洗頭瘡。白

禿。漬惡刺瘡。日十次。愈。乃止。熱飲治反胃殺蟲。白

李時珍曰。馬尿治癥瘕有驗。按祖台之志怪云。昔

有人與其奴。皆患心腹痛。奴死。剖之。得一白鼈。赤

眼仍活。以諸藥納口中。終不死。有人乘白馬觀之。

馬尿墮鼈而鼈縮。遂以灌之。即化成水。其人乃服

白馬尿而疾愈。此其微效也。反胃有蟲。亦能治之。

白馬屎微溫無毒。止渴。止吐血。下血。鼻衄。金瘡。出

血。婦人崩中。敷頂止衄。絞汁服。治產後諸血氣傷。

寒時疾。當吐下者。治時行病起。合陰陽垂死者。絞

汁三合。日夜各二服。又治杖瘡打損傷瘡。中風作

痛者。炒熱包熨五十遍。極効。絞汁灌之。治卒中惡

死。酒服。治產後寒熱。悶脹。燒灰水服。治久痢赤白。

和豬脂塗馬咬人瘡。白馬汗入瘡。剝死馬骨刺傷人。毒攻欲死者。尿中粟。治金瘡。馬絆繩。煎水洗小兒。痛。東行馬蹄下土。作方術。可知女人外情。

○附方

治腸癰腹痛。其狀兩耳輪甲錯。腹痛或遶臍有瘡。如粟。下膿血。用馬蹄灰和雞子白塗之。卽拔毒氣出也。

治黥刺。雕青。以白馬汗搽上。再以汗調水蛭末塗之。

治尸厥卒死。用白馬前脚夜目二枚。白馬尾十四莖。合燒。以苦酒丸如小豆大。白湯灌下。二丸須臾再服。卽甦。

治赤根疔瘡。馬牙齒燒存性爲末。臘豬脂和敷。根卽出也。

治臙瘡潰爛。三四年馬牙床骨燒研。先以土窖過小便。洗數次。傳之。

家中午地埋馬頭骨。宜蠶浸于上流。絕水。基蟲治蟲蝕肛門腐爛。見臟腑則死。以豬脂和馬蹄灰。

綿裏導入下部。日數度瘥。

治牙齒疼痛。用白馬尿浸茄科三日。晒乾炒為末。

點牙即落。或煎巴豆點牙亦落。勿近好牙。

治攪腸痧欲死者。用馬屎研汁飲之立愈。

驢

李時珍曰。驢長頰廣額。梨耳修尾。夜鳴應更。性善馱負。有褐黑白色。女直遼東出野驢。似驢而色駁。鬃尾長。骨格大。食之功與驢同。西土出山驢。有角如羚羊。東海島中出海驢。能入水不濡。又有海馬海牛。海猪海獾等物。其皮皆供用。

驢肉味甘涼無毒。治解心煩。止風狂。釀酒治一切風。

又治憂愁不樂。能安心氣。同五味煮食。或以汁作

補血益氣。治遠年勞損。煮汁空心飲。療痔引

驢肉功同食。驢肉飲。荆芥茶。殺人妊婦食之。

產難。同鳧苳食。令人筋急。病死者有毒。○寇宗奭

曰。驢肉食之。動風。脂肥尤甚。屢試屢驗。昔人以爲

止一切風狂。未可憑也。頭肉煮汁服。二三升。治多

年消渴。無不瘥者。又以漬麴醞酒服。去大風。動搖

不伏者。亦洗頭。風風屑。同薑薑煮汁。日服。治黃疸

百藥不治者。脂敷。治惡瘡疥癬。及風腫。和酒服。三

升。治狂癲。不能語。不識人。和烏梅爲丸。治多年瘧

未發時服二十九。又生脂和生椒搗熟綿裹塞耳
治積年聾疾。和酒等分服。治卒咳嗽。和鹽塗身體
手足風腫。[髓]味甘温。無毒。治耳聾。[血]味鹹凉。無毒。
主利大小腸。潤燥結。下熱氣。[乳]味甘冷。利無毒。小
兒熱急黃。多服使利。療大熱止消渴。小兒熱急驚
邪赤痢。小兒癩瘡。客忤天甲風疾。卒心痛。連腰臍
者。熱服三升。蜘蛛咬瘡。蠶盛。浸之。蚰蜒及飛蟲入
耳。滴之。當化成水。頻熱飲之。治氣鬱解。小兒熱毒
不生痘疹。浸黃連取汁。點風熱赤眼。[陰莖]味甘温。

無毒。主強陰壯筋。[駒衣]斷酒。煨研酒服。方寸七皮。

煎膠食之。治一切風毒。骨節痛。呻吟不止。和酒服。

更良。膠食主鼻洪吐血。腸風血痢。崩中帶下。其生

皮覆瘡。疾人良。[毛]治骨頭中一切風病。用一斤炒

黃。投一斗酒中。漬三日。空心細飲。令醉。暖卧。取汗。

明日更飲如前。忌陳倉米粥。[骨]煮湯浴。歷節風。牝

驢骨煮汁服。治多年消渴。極效。[頭骨]燒灰和油。塗

小兒顱解。[懸蹄]燒灰。傅癰疽。散膿水。和油。傅小兒

解顱。以瘡為度。[溺]味辛寒。有小毒。浸蜘蛛咬瘡。良

治反胃噎病。狂犬咬傷。癰癤惡瘡。並多飲取。瘡風蟲牙痛。頻含漱之良。屎熬之熨。風腫漏瘡。絞汁主心腹疼痛。諸症忤癘。癩。反胃不止。牙齒痛。治水腫。每服五合良。燒灰吹鼻止衄。甚効。和油塗惡瘡。溼癬耳垢。刮取塗治。蠍螫尾軸垢。治新久瘡。無定期者。以水洗汁和麩如彈丸二枚。作燒餅未發前食一枚。發時食一枚。力効。**驢槽**治小兒拗哭不止。令三姓婦人抱兒臥之。移時即止。勿令人知。○李珍珍曰。錦囊詩云。繫驢懸門除鬼疾。画驢掛壁止兒啼。言關西人以蟹殼懸之。辟邪瘧。江左人画倒驢掛之。止夜啼。與驢槽止哭之義同。皆厭禳之法耳。

○朱丹溪曰。一婦病噎。用四物湯加驢尿與服。以防其生蟲。數十貼而愈。○時珍曰。張文仲備急方言。幼年患反胃。每食羹粥諸物。須臾吐出。真觀中許奉御兄弟及柴蔣諸名醫奉勅調治。竟不能療。漸疲困。候絕旦夕。忽一衛士云。服驢尿極驗。遂服二合。後食止吐。一斗晡時再服二合。食粥便定。次日奏知。則宮中五六人患反胃者同服。一時俱瘥。

此物稍有毒。服時不可過多。須熱飲之。病深者。七日當效。後用屢驗。

○附方

治風入頭腦。頭目眩暈。用烏驢頭一箇。如食法。豉汁煮食之。立止。

治目中弩肉凸出。用驢脂白鹽等分。和勻。注兩目。背日三次。一月瘥。

治小兒口噤不啼哭。驢乳猪乳各二升。煎一升。五合服。大效。

治中風口眼喎斜。用烏驢皮。燂毛如常。治淨蒸熟。入豉汁中。和五味煮食之。即愈。此方又治骨節疼痛。極效。

治多年耳聾。重者用三兩度。初起者一上便效。用驢前脚脛骨。打破向日中瀝出髓。以磁器收之。每用綿點少許。入耳內。側臥候藥行。其髓不可多用。以白色者為上。黃色者不堪。○又方。烏驢脂少許。鯽魚胆一個。生油半兩。和勻。納葱管中。七日取滴耳中。

治牛皮風癬生驢皮一片以朴硝淹過燒灰油調搽之名一掃光

治飲酒過度成漏欲穿膠者用驢蹄硬處翻下水煮濃汁冷飲之襄州散將樂小蠻得此方大效

治白玷風驢尿薑汁等分和勻頻洗

騾

李時珍曰騾大于驢而健于馬其力在腰其後有鎖骨不能開故不孳乳其類有五牡驢交馬而生者(騾也)牡馬交驢而生者(駃騾)音決題牡驢交牛而生者(駃駃)音宅陌牡牛交驢而生者(驢驢)音謫蒙牡牛交馬而生者(駃驢)今俗通呼為騾

騾肉味辛苦温有小毒○齊原曰騾性頑劣肉不益

入孕婦食之難產○昔趙簡子有白騾甚愛之其

臣陽城渠胥有疾醫云得白騾肝則生不得則死

簡子聞之曰殺畜活人不亦仁乎乃殺騾取肝與

之渠胥病愈但不載所患何疾取肝何義書之於

此以俟識者蹄治難產燒灰入麝香少許酒服一

錢尿治打損諸瘡破傷中風腫毒炒焦裏熨之冷

即易

駝

一名橐駝一名駱駝其種有野有家俱出塞北河西野駝今惟西北番界有之家駝則此中人家蓄養生息者駝狀如馬其頭似羊長項垂耳脚有三節背有兩肉峰如鞍形有蒼

褐黃紫數色其聲曰圓其食亦齷其性耐寒
 惡熱故夏至退毛至盡毛可為瑇其糞煙亦
 直上如狼煙其力能負重可至千斤日行二
 三百里又能知泉源水脉風候凡伏流人所
 不知駝以足踏處即得之流沙夏多熱風行
 旅遇之即死風將至駝必聚鳴埋口鼻於沙
 中人以爲驗也其臥而腹不著地屈足露明
 者名明駝最能行遠于闐國有風脚駝其疾
 如風日行千里土番有獨峰駝西域傳云大
 月氏出一封駝脊上有一峰隆起若封土故
 俗呼爲封牛嶺南徐聞縣及海康皆出之
 南史云滑國有兩脚駝諸家所未聞也

駝肉味甘温無毒治諸風下氣壯筋骨潤肌膚主惡

瘡脂味甘温無毒治頑痺風瘙惡瘡毒腫死肌筋

皮攣縮踠損筋骨火灸摩之取熱氣透肉亦和米

粉作煎餅食之療痔治一切風疾皮膚痺急及惡

瘡腫漏爛竝和藥敷之主虛勞風有冷積者以燒

酒調服之○寇宗奭曰家駝峯蹄最良人多煮熟

糟食乳味甘冷無毒主補中益氣壯筋骨令人不

饑黃味甘平微毒治風熱驚疾○李時珍曰駱駝

黃似牛黃而不香戎人以亂牛黃而功不及之毛

治女人赤白帶下最良領毛療痔燒灰酒服方寸

匕屎乾研嚙鼻止衄燒烟殺蚊虱

○附方

治中風口眼喎斜。語言蹇澀。以駱駝肉如常作羹食之。

治人肌膚粗澀。身多疥癩。用駱駝肉切細。入甘草豉汁煮食之。

治風瘙頑癬。爛皮死肌及筋脉短縮。用駱駝脂油和米粉或麩作餅食之。

治痔疾他方不效者。用五倍子爲末。以駱駝脂油調付之。卽愈。

治下疳瘡。用駱駝細絨毛燒灰水澄過。入炒黃丹等分爲末。搽。卽愈。

治鼻中出血不止。他藥不效。用駱駝尿晒乾爲末。吹入鼻中。卽止。

治人家屋壁生鼈虱。用駱駝屎同蟹殼鰾骨共一處燒之。卽絕種。

食物本草卷之十四目錄

獸部二 二類

野獸類一 三十六種

獅

虎

豹

貊

象

犀

犛牛

牯牛

野馬

野豬

豪豬

熊

薄辰

麇羊

山羊

鹿

麋

麂

麋

麇

麝

靈貓

狸

風狸

狐

貉

貓

獾

木狗

豺

狼

兔

山獺

水獺

海獺

膾膈獸

鼠類

十種

鼠

鼯鼠

隱鼠

鼯鼠

竹鼯

土撥鼠

貂鼠

黃鼠

鼯鼠

狷

猴類 五種

獼猴

狨

食物本草卷之十四

元 東垣李杲 編輯

明 瀕湖李時珍 叅訂

獸部

二

野獸類

獅 一名狻猊 一名虺 音鬻 出西域諸國 狀如虎 而小 黃色 亦如金色 狻猊 而頭大 尾長 亦有

青色者 銅頭 鐵額 鉤爪 鋸牙 弭耳 昂鼻 目光 如電 聲吼如雷 有鬣 牡者 尾上茸毛 大如

斗 日走五百里 為毛蟲之長 怒則威在齒 喜 則威在尾 每一吼則百獸辟易 馬皆溺血 食

虎吞獲裂屏分象。啖諸禽獸。以氣吹之。羽毛紛落。其乳入牛羊。諸乳中。皆化成水。雖死。後虎豹不敢食其肉。蠅不敢集其尾。物理相畏如此。然博物志載。魏武帝至白狼山。見物如狸。跳至獅子頭。殺之。唐史載。高宗時。伽毘耶國獻天鐵獸。能擒獅象。則獅雖猛悍。又有制之者也。西域畜之。七日內。取其牙。開目者。調習之。若稍長。則難馴矣。

獅肉味甘辛熱。無毒。食之壯膽助神。雄健威武。屎服之。破宿血。殺百蟲。燒之。去鬼氣。

虎

一名大蟲。一名山猫。山獸之君也。多山林處。皆有之。狀如猫而大如牛。黃質黑章。鋸牙鉤爪。鬚健而尖。舌大如掌。生倒刺。項短鼻。艱夜視。一目放光。一日看物。聲吼如雷。風從而生。百獸震恐。立秋虎始嘯。仲冬虎始交。月暈時亦交。不再交。孕七月而生。知衝破。能畫地觀。

奇耦以下。食虎噬物。隨月旬上下。而齧其首尾。其搏物。三躍不中。則舍之。人死於虎。則為俚鬼。導虎而行。虎食狗。則醉。狗乃虎之酒也。聞羊角烟。則走。惡其臭也。虎害人獸。而蝟鼠能制之。智無大小也。獅駝。曾耳。黃腰。渠搜。能食虎。勢無彊弱也。曾耳。似虎。能食虎豹。世治則見。駝狀如馬。白身黑尾。一角鋸牙。渠搜。西戎。露犬也。黃腰。馳身狸首。俱逐虎之獸也。

虎肉味酸平。無毒。主惡心。欲嘔。益氣力。止多唾。食之

治瘡。辟三十六種精魅。入山鬼見畏之。熱食虎肉。

壞人齒。正月勿食虎肉。傷人神。○李時珍曰。虎肉

作土氣。味不甚佳。鹽食稍可。虎骨味辛熱。無毒。治

邪惡氣。殺鬼疰毒。止驚悸。治惡瘡。鼠瘻。頭骨尤良。

又治筋骨毒風攣急。屈伸不得。走注疼痛。治尸注腹痛。傷寒温氣温瘧。殺犬蛟毒。雜硃砂畫符。煮汁浴之。去骨節風毒腫。和醋浸膝。止脚痛腫。脛骨尤良。初生小兒煎湯浴之。辟惡氣。去瘡疥驚癇。鬼疰。長大無病。追風定痛。健骨。止久痢脫肛。獸骨。髓咽。頭骨作枕。辟惡夢魘。置戶上辟鬼。○蘇頌曰。李絳兵部手集有虎骨酒。治臂脛痛。及腰脚不隨。蓋以虎為金。風為木。木受金制。焉得不從。而病安得不瘥。故曰風從虎。虎嘯而風生。自然之道也。所以治風病攣急。屈伸不便。走注骨節風毒癩疰。驚癇諸病。皆此義也。○汪機曰。虎之強悍。皆賴於脛。雖死而脛猶屹立不仆。故治脚脛無力用之。○虎骨用頭及脛骨。色黃者佳。凡虎身數物。俱用雄虎者勝。藥箭射殺者。不可用。其毒浸漬骨血間。能傷人也。○凡用虎之諸骨。竝槌碎去髓。或塗酥。或酒或醋。炙脆用。威骨虎有威骨如乙字。長一寸。在脇兩傍。破肉取之。令人有威。佩之臨官佳。無官則為人所憎。膏主狗咬瘡。納下部。治五痔下血。服之治反胃。煎消塗小兒頭瘡。

白禿血主壯神強志抱朴子云三月三日殺取虎
血鴨血等分和合以初生草似胡麻子取其實合
用可以移形易貌肚治反胃吐食取生者勿洗存
滓穢新瓦固煨存性入平胃散末一兩和勻每白
湯服三錢效腎治瘰癧膽治小兒驚癇疳痢神驚
不安研水服之睛治癩疾瘡病小兒熱疾驚悸狂
啼客忤疝氣鎮心安神明目去翳凡用之須酒浸
炙乾用虎魄凡虎夜視一日放光一日看物獵人
候而射之弩箭纜及目光即墮入地
得之如白石者是矣主驚邪辟惡鎮心○按茅亭客話云獵

人殺虎記其頭項之處月黑掘下尺餘方得狀如
石子琥珀此是虎之精魄淪入地下故主小兒驚
癇之疾鼻治癩疾小兒驚癇懸戶上令生男○李
時珍曰按河魚圖云虎鼻懸門中經年取熬作屑
與婦人服之便生貴子勿令人及婦知知則不驗
此與古者胎教欲見虎豹取其勇壯之義同也牙
治丈夫陰瘡及疽癩殺勞蟲治獾犬傷發狂刮末
酒服方寸匕瓜繫小兒臂辟惡魅皮治瘡疾辟邪
魅虎豹皮上睡令人神驚其毛入瘡有大毒鬚治

齒痛唐許遠齒痛仙人鄭思遠拔虎鬚令插之即愈尿治惡瘡辟鬼氣瘡癩疽痔漏燒研酒服治獸骨髓。

○附方

治歷節走痛用虎頭骨一具塗酥炙黃槌碎浸酒內五宿後隨量飲之。

肛門挺出虎骨燒末日服方寸匕。

治小兒夜啼用大蟲眼睛一隻為末以竹瀝調少許服之。

預知散治健忘驚悸用虎骨酥炙白龍骨遠志肉等分為末日三服薑湯下久則令人聰慧。

治腰脚不隨攣急疼痛取虎脛骨五六寸刮去肉膜塗酥炙黃搗細絹袋盛之以瓶盛酒一斗浸之燻火微温七日後任意飲之當微利便效也。○又

方虎腰脊骨一具前兩脚全骨一具槌碎安鐵床上文炭火炙待脂出則投無灰酒中密封春夏七日秋冬三七日日飲三次患十年者不過三劑五年上下者一劑即瘥。

治休息痢疾。經年不愈。取大蟲骨炙焦搗末。服方寸七。日三。

治痔漏脫肛。用虎脛骨兩節。以蜜二兩。炙黃搗末。蒸餅丸。梧子大。每早温酒下二十九。

治獸骨鯁咽。虎骨為末。水服方寸七。極效。亦治惡犬咬傷。外敷內服。

治脾胃虛弱。不思飲食。惡心。以葱椒醬豉炙虎肉。空心食之。

治反胃。虎脂半兩。清油一斤。浸一月。酒下一兩。

豹 遼東及西南諸山時有之。狀似虎而小。白面豹。團頭。自惜其毛采。其文如錢者曰金錢豹。宜為裘。如艾葉者曰艾葉豹。次之。又西域有金線豹。文如金線。海中有水豹。上應箕宿。虎生三子。一為豹。豹畏蛇與鼯鼠。而獅駭渠搜能食之。廣志云。狐死首丘。豹死首山。不忘本也。豹胎至美。為八珍之一。

豹肉味酸平。無毒。主安五臟。補絕傷。壯筋骨。強志氣。辟鬼魅。神邪。耐寒暑。瘴厲。冬食利人。威健勇猛。正月勿食。能傷神損壽。○孟詵曰。豹肉令人志性麤豪。食之便覺少頃消化。乃定。久食亦然。脂合生髮膏。朝塗暮生。亦入面脂。鼻治狐魅。同狐鼻水煮服。

治夢與鬼交。及狐狸精怪。頭骨作枕。辟邪。燒灰淋汁。去頭風。白屑皮不可藉睡。令人神驚。其毛入人瘡中。有毒。廣西西南界有啞臘蟲。食死人尸。不可驅逐。惟以豹皮覆之。則畏而不來。否則死尸頃刻都盡。

獾

音陌。似熊而頭小。脚卑。黑白駁文。毛淺。有光澤。能舐食銅鐵。及竹骨。蛇虺。其骨節強直。中實少髓。唐世多畫獾作屏。白樂天有贊序之。今黔蜀及峩峩山中時有之。象鼻犀目。牛尾虎足。土人鼎釜多為所食。頗為山居之患。人亦捕之。其齒骨極堅。以刀斧椎煨。鐵皆碎落。火亦不能燒。人得之。詐充佛牙。佛骨。以狂俾俗。○李時珍曰。按埤雅云。獾似熊。獾首豺髮。

銳鬣卑脚。糞可為兵。切玉。尿能消鐵。為水。又有異獸曰。嚙鐵。豺。昆吾。兎。皆能食銅鐵。亦獾類也。今并及之。嚙鐵。神異經云。南方有獸。角足大小。狀如水牛。毛黑如漆。食鐵而飲水。糞可為兵。其利如鋼。名曰嚙鐵。唐史載叶火羅進大獸。高七尺。食銅鐵。日行三百里。豺。禽書云。豺。應井星。胡狗也。狀似狐而黑。身長七尺。頭生一角。老則有鱗。能食虎豹。蛟龍。銅鐵。獵人亦畏之。狡兔。拾遺記云。狡兔生昆吾山。形如兔。雄黃雌白。食丹石。銅鐵。昔吳王武庫。兵器皆盡。掘得二兔。一白一黃。腹中腎膽皆鐵。取鑄為劍。切玉如泥。

獾肉。味辛平。食之主削堅。破積皮。寢之。驅瘟疫。厲氣。

辟溼氣。邪氣。膏治癰腫。能透肌骨。膏以銅鐵瓦器盛之。皆漏。仍以

其骨盛尿治誤吞銅鐵入腹者。水和服之。即化為

水

象

蘇頌曰、爾雅云、南方之美者、有梁山之犀象焉、今多出交趾、潮循諸州、彼人捕得、爭食其肉、云肥堪作炙、陳藏器云、象具十二生肖、各有所分段、惟鼻是其本肉、炙食糟食更美、又膽不附肝、隨月在諸肉間、如正月建寅在虎肉、二月建卯在兔肉也、徐鉉云、象膽隨四時春在前左足、夏在前右足、秋後左足、冬後右足也、淳化中、一象春斃、太宗命取膽不獲、使問鉉、鉉以此對、果得於前左足、○李時珍曰、象出交廣、雲南及西域諸國、多至成羣、有灰白二色、形體擁腫、面目醜陋、犬者身長丈餘、高稱之、肉倍數、牛、日纔若豕、四足如柱、無指而有瓜甲、行則先移左足、臥則以臂着地、老頭不能俯、其頸不能回、其耳下驪、其鼻大如臂、下垂至地、鼻端甚深、可以開闔、中有小肉瓜、能食針芥食物、飲水皆以鼻卷入口、一身

之力、皆在於鼻、故傷之則死、耳後有穴、薄如鼓皮、刺之亦死、口內有食齒、兩吻田兩牙夾鼻、雄者長六七尺、雌者纔尺餘耳、交北則在水中、以胸相貼、與諸獸不同、其育也、立歲始產、六十年骨方足、其性能久、識嗜芻豆甘蔗與酒、而畏煙火、獅子巴蛇、南人殺野象、多設機、穿以陷之、或埋象鞋於路、以貫其足、捕生象、則以雌象為媒、而誘獲之、飼而狎之、久則漸解、人言、使象奴牧之、制之以鉤、左右前後罔不如命也、其皮可作甲、切條以貫器物、西域重象牙、用飾牀座、中國貴之、以為帶笏、然玉杯象筋、自古尚矣、象聞雷聲、則牙花暴出、逡巡復沒、古語云、犀因望月、紋生角、象為聞雷、花發牙、象每蛻牙、自埋藏之、復每簡視、番人以木牙、潛易取焉、○時珍又曰、世人知然犀、可見水怪、而不知沉象、可驅水怪、按周禮、壺涿氏、掌水蟲、欲殺其神者、以樟木貫象齒、而沉之、則其神死、而淵為陵、註云、樟木、山榆

也。以象齒作十字貫於木而沈之。則龍罔象之類死也。又按陶貞白云。凡夏月合藥。宜置象牙於傍。合丹竈。以象牙夾竈。得雷聲。乃能發光。觀此。則象之辟邪。又不止於驅怪而已。宜乎其能治心肝驚癇迷惑邪魅之疾也。而昔人罕解用之。何哉。

象肉味甘淡平。無毒。多食令人體重。生煮汁服。治小便不通。燒灰飲服。治小便多。和油塗禿瘡。象肉肥脆。少類猪肉。味淡而滑。故能利竅。燒之則從火化。故又能縮小便。牙味甘寒。無毒。治諸鐵及雜物入肉。刮牙屑和水傅之。立出。治癩病。刮齒屑炒黃研末。飲服。諸物刺喉中。磨水服之。亦出。舊梳屑尤佳。

治風癇驚悸。一切邪魅精物熱疾骨蒸及諸瘡。並宜生屑入藥。膽味苦寒。微毒。主明目療疳。治瘡腫。以水化塗之。治口臭。以綿裹少許貼齒根。平日漱去數度。即瘥。睛治目疾。和人乳滴目中。皮治下疳。燒灰和油傅之。又治金瘡。不合骨。主解毒。胸前小橫骨。燒灰酒服。令人能浮水。

○附方

治小水急脹不通用象牙煎湯服之。若小便過多。燒灰服之。

治諸獸骨鯁象牙磨水吞之。

治骨刺入肉象牙刮末以水煮白梅肉調塗效。

治鍼箭入肉象牙刮末水和敷之即出也。

治內障目翳如偃月或如蘿蔔花用象胆半兩鯉

魚胆七枚熊胆一分牛胆半兩麝香一分石決明

末一兩為末糊丸菉豆大每茶下十丸日二服

象骨散治脾胃虛弱水穀不消噫氣吞酸吐食霍

亂洩瀉腹痛裏急頻併不思飲食諸症用象骨四

兩煨肉豆蔻枳殼各炒一兩訶子肉甘艸各炒二

兩乾薑半兩炒為末每服三錢水一盞半煎至八

分和滓熱服。

犀

出永昌山谷及益州即今滇南也有二角以額上者為勝又有通天犀角上有一白縷直上至端夜露不濡入藥至神驗或云此是水犀角中出水漢書所謂駭雞犀者置米飼雞皆驚駭不敢啄置屋上鳥鳥不敢集特犀即雌犀文理細膩斑白分明服用為上入藥不如雄者抱朴子言水犀刻為魚銜之入水水開三尺蘇頌曰犀似水牛猪首大腹卑脚脚似象有三蹄黑色舌上有刺好食荆棘皮上每一孔生三毛彼人取犀先於山路多植朽木如猪羊棧其犀前脚直常依木而息爛木忽折倒仆久不能起因格殺之其犀每歲一退角必自理於山中海人潛作木角易之冉三不離其處若直取之則後藏於別處不

可尋矣。又異物志云：山東海水中，有牛，樂聞絲竹，彼人動樂，則牛出聽，因而采之，有鼻角頂角，以鼻角為上。○李時珍曰：犀出西番南番、滇、南交州諸處，有山犀、水犀、兕犀三種，又有毛犀，似之。山犀居山林，人多得之。水犀出入水中，最為難得，並有二角，鼻角長而額角短，水犀皮有珠甲，而山犀無之。兕犀即犀之孛者，止有一角，在頂，文理細膩，斑白分明，不可入藥。蓋牯角文大而特，角文細也。洪武初，九真曾貢之。犀角紋如魚子形，謂之粟紋。紋中有眼，謂之粟眼。黑中有黃花者為正透，黃中有黑花者為倒透。花中復有花者為重透。並名通犀，乃上品也。花如椒豆斑者，次之。烏犀純黑無花者為下品。其通天夜視，有光不名。夜明犀，故能通神，開水飛禽走獸見之皆驚。又山海經有白犀，白色，開元遺事有辟寒犀，其色如金，交趾所貢。冬月煖氣襲人，白孔六帖有辟暑犀。唐文宗得之，夏月能清是氣。

嶺表錄異有辟塵犀，為簪梳帶胯，塵不近身。杜陽編有蠲忿犀，云為帶，令人蠲去忿怒，此皆希世之珍，故附見之。

犀肉味甘鹹平，無毒。食之主利五臟，清內熱，不飢延

年。角味苦酸鹹寒，無毒。主百毒蠱疰，邪鬼瘴氣，殺

鉤吻，鳩羽蛇毒，除邪不迷，惑魘寐，久服輕身。又治

傷寒溫疫，頭痛寒熱，諸毒氣。令人駿健，辟中惡毒。

氣鎮心神，解大熱，散風毒，治發背癰疽瘡腫，化膿

作水療時疾，熱如火，煩毒，人心狂言妄語，定驚悸。

鎮肝明目，安五臟，補虛勞，退熱消痰，解山瘴溪毒。

磨汁治吐血衄血下血及傷寒畜血發狂譫語斑
黃悶亂痘瘡稠密內熱黑陷或不結痂瀉肝涼心
清胃解毒。○抱朴子云犀食百草之毒及衆木之
棘所以能解毒凡盡毒之鄉有飲食以此角攪之
有毒則生白沫無毒則否以之煮毒藥則無復毒
勢也。北戶錄云凡中毒箭以犀角刺瘡中立愈昔
温嶠過武昌牛渚磯下多怪物嶠然犀角照之而
水族見形淮南子云犀角置穴狐不敢歸則犀之
精靈辟邪逐魅益可見矣

○附方

治吐血不止似雞鴨肝用生犀角桔梗等分每酒
服二錢。

治中惡氣鬼氣其症或暮夜登廁或出郊外或弔
喪問病或入冷廟或踏荒坵驀然倒地厥冷握拳
口鼻出血須臾不救似乎尸厥但腹不鳴心腹煖
爾勿移動令人圍繞燒火打鼓或燒蘇合香安息
香麝香之類候醒乃移動用犀角爲君麝香硃砂
各減半爲末每水調二錢服卽愈。

治臥寐魘死勿以火照但唾其面痛嚙其足大指
即活以犀角置枕中永無魘患。

治小兒驚癇不知人嚼舌仰目用犀角磨水服之
立效

治下痢鮮血用犀角地榆生地黃各一兩為末煉
蜜丸如彈子大每用一丸溫水下。

治食野雞中毒吐下不止用生犀角末方寸匕新
汲水調服即瘥

治服藥過劑犀角燒末水服方寸匕。

犛牛

犛音俚出西南徼外居深山中野牛也狀
及毛尾俱同犛牛犛小而犛大有重千斤
者其尾名曰羆亦可為旌旄纓帽之用唐宋
西徼諸州貢之其角甚長而黃黑相間製弓
極勁彼人以偽犀角卒莫能辨曹昭格古論
云犛牛角之花斑皆類山犀而無栗紋其理
似竹不甚為奇又有野牛與此相類者曰犛
牛犛音危出蜀山中如牛而大肉重數千斤
食之不飢犛牛出日南及潯州大賓縣色青
黃與蛇同穴性嗜鹽人裹手塗鹽取之其角
如玉可為器海牛出登州海島中形似牛鬣
脚鮎毛其皮甚軟可供百用脂可燃燈月支
牛出西胡及大月氏國今日割取肉明日其
新即復合也山牛狀如牛而角有枝如鹿角
也。

犛牛味甘平無毒食之已飢益脾胃角味酸鹹涼無

毒。治驚癇熱毒諸血病

牦牛

牦音毛。李時珍曰：牦牛出甘肅臨洮及西南徼外，番人多畜養之，狀如水牛，體長多力，能載重，迅行如飛，性至麤梗，髀膝尾背胡下，皆有黑毛，長尺許，其尾最長，大如斗，亦自愛護，草木鉤之，則止而不動。古人取為旌旄，今人以為纓帽，毛雜曰色者，以茜染紅色。山海經云：潘侯之山有旄牛，狀如牛而四足節生毛，即此也。其肉味美，故呂氏春秋云：肉之美者，牦象之肉也。

牦牛肉味甘平。無毒。食之益五臟，滋六腑，利三焦。喉

治瘦氣結在項下。○臞仙壽域方有治瘦氣方。用

牦牛喉脆骨二寸許一節連兩邊扇動脆骨取之。

或者或燒。仰臥頓服。仍取巧舌。

即壓子也。

爵爛噉之。食

頃乃嚙。病人容貌必瘦減而瘦自內消矣。不過二

服即愈。云神妙無比也。

野馬

似馬而小，出塞外，今西夏甘肅及遼東山中亦有之，取其皮為裘，食其肉如家馬肉。但落地不沾沙耳。爾雅云：驕如馬，一角似鹿茸，不角者驕也。山海經云：北海有獸狀如馬，色青，名曰騶駼。此皆野馬類也。

野馬肉味甘平。有小毒。治人病馬癇筋脉不能自收

周痺肌肉不仁。○孫真人有方治上證。用肉一斤。

豉汁煮熟。入五味葱白。作腌腊及羹粥頓食之。陰

莖味酸鹹溫無毒治男子陰痿縮少精

野猪

處處山林有之陝洛間更多其形似家猪但腹小脚長毛褐色牙出口外如象牙其肉有至二三百斤者能與虎鬪羣隊而行獵人惟敢射最後者若射中前者則散走傷人又能掠松枝曳沙泥塗身以禦矢最害田禾亦啖蛇虺其肉赤色如馬肉食之勝家猪牝者肉味更美淮南子曰野豨穴居有芄苢櫟櫛堀虛連比以象宮室陰以防雨景以蔽日亦其知也又嶺南一種嬾婦似山猪而小善害禾稼惟以機軸紡織之器置田所則不復也近也

野猪肉味甘平無毒治癩癧補肌膚益五臟令人肥

臑不發風炙食治腸風下血青蹄者不可食微動

風脂煉淨和酒日三服令婦人多乳十日後可供

三四兒素無乳者亦下又悅色除風腫毒治疥癬

膽治惡熱毒氣鬼疰癩癧小兒諸疖水研棗許日

二服膽中黃味甘平無毒治金瘡止血生肉療癩

癩水研棗核許服又治血痢疰病小兒疖氣客忤

天弔外腎治崩中帶下腸風瀉血血痢皮燒灰塗

鼠瘦惡瘡齒燒灰水服治蛇咬毒頭骨治邪瘧

豪猪

陝洛江東諸山中竝有之髦間有豪如箭能射人○李時珍曰豪猪處處深山中有多者成羣害稼狀如猪而項脊有棘鬣長近尺許粗如筋其狀如筭及帽刺白本而黑

端怒則激去如矢射人。羌人以其皮爲鞞。此獸亦自爲牝牡而孕。倦游錄云南海有泡魚。大如斗。身有棘刺。能化爲豪猪。異爲魚。坎爲豕。豈異變坎乎。

豪猪肉味甘大寒有毒。多膏主利大腸。不可多食。發

風令人虛羸。肚味甘寒無毒。治水病鼓脹黃疸。奔

豚脚氣連尿燒一具。空心溫酒服二錢匕。卽消。

熊

生雍州山谷。今東西諸山皆有之。形類大豕而性輕捷。好攀緣上高木。見人則顛倒自投於地。冬蟄入穴。春月乃出。其足名蹠。爲八珍之一。古人重之。然膈之難熟。熊性惡鹽。食之卽死。搜神記云。熊居樹孔中。東土人擊樹。呼爲子路。卽起。不呼則不動也。○李時珍曰。熊如大豕而豎目。人足黑色。春夏臙肥。時皮厚筋弩。每升木引氣。或墮地自快。俗呼跌臙。卽

莊子所謂熊經身申也。冬月蟄時不食。飢則舐其掌。故其美在掌。謂之熊蹠。宜孟子引以爲喻。其行山中。雖數千里。必有跚伏之所在。石巖枯木。山中人謂之熊館。其性惡穢物。及傷殘。捕者置此物於穴。則合穴自死。或爲棘刺所傷。出穴瓜之。至骨卽斃也。其膽春近首夏在腹。秋在左足。冬在右足。熊羆皆壯毅之物。屬陽。故詩以喻不二心之臣。而詩以爲男子之祥也。又有羆。羆二種。亦熊類也。如豕色黑者。熊也。大而色黃白者。羆也。小而色黃赤者。羆也。羆頭長脚高。猛健多力。能拔樹木。虎亦畏之。遇人則人立而攫之。故俗呼爲人熊。關西呼爲羆熊。又有猪熊。形如豕。馬熊形如馬。俱羆也。或云羆卽熊之雄者。其白如熊。白而理粗。味減。切用亦同。

熊肉味甘平。無毒。治風痺筋骨不仁。補虛羸。殺勞蟲。

久服強志不飢輕身長年有痼疾者食之終身不
瘥若腹中有積聚寒者食之永不除也十月勿食

之傷神掌熊掌難胸得酒醋水三件同煮即大如皮毬也食之可禦風寒

益氣力脂即熊白乃背上肪色白如玉味甚美冬月則有夏月則無其腹中肪及身中脂

只可煎煉入味甘微寒無毒主風痺不仁筋急五臟腹中積聚寒熱羸瘦頭瘍白禿面上疥皴久服

不飢延年補虛損殺勞蟲酒鍊服之長髮令黑悅

澤人面治面上黥黥及瘡不可燃燈烟損人目令

失光明膽熊膽多贗但取一粟許滴水中一道若線不散者為真又以米粒大點水中連

轉如飛者良餘膽亦轉但緩爾熊膽又然也味苦寒無毒治時氣熱盛變為黃疸暑月久

痢疴墜心痛疰忤耳鼻瘡惡瘡殺蟲退熱清心平

肝明目去腎殺蛇蟲小兒驚癇癍瘕以竹瀝化兩

豆許服之去心中涎甚良腦髓治耳聾療頭旋血

治小兒客忤骨作湯浴歷節風及小兒客忤驚癇

邪熱

○附方

治目中障翳用熊膽入冰片少許點之

中風痿痺。手足不隨筋脉緩縱。用熊肉一斤。切入豉汁中。和葱薑椒鹽作醃腊。空腹食之。

治毛髮焦黃。用熊脂蔓荊子末等分。和勻。醋調塗之。又方以熊脂塗髮。梳散入牀底。伏地一食頃。卽出。便黑色如漆。

治小兒白禿頭瘡。以熊脂傅之。

治小兒初生。目閉不開。由胎中受熱故也。以熊胆少許。蒸水洗之。一日七八次。如三日不開。服四物加甘艸天花粉。

治年久痔疾。熊胆塗之。神效。一切方不及也。

治腸風痔漏。熊胆半兩。入片腦少許。研和。猪胆汁塗之。

治小兒疳膨。食積。日晡發熱。肚大骨立。熊胆使君子末等分。研勻。磁器蒸溶。蒸餅丸。麻子大。每米飲下二十丸。

薄辰

生雲南鶴慶府山野間。大如狐而人立。手足類熊。炙之甚美。

薄辰肉。味甘溫。無毒。食之補中。煖脾胃。利血脉。止洩痢。掌甚美。食之補真元。令人多子。

麋羊

一名羴羊，王安石字說云：鹿則比類，環角

可謂靈也，故字從鹿。從需，省文。後人作羴，今出建平，宜都及西域諸蠻山中，多兩角，一角者為勝，角多節，蹙蹙圓繞，別有山羊，其角極長，惟一邊有節，節亦疎大，羌夷謂之羴羊，能陟峻險，又有山驢，大如鹿，皮可作靴，有兩角，陳藏器曰：山羊、山驢、羴羊，三種相似，而羴羊有神，夜宿防患，以角掛樹，不着地，但角彎中深銳，緊小有掛痕者為真，其疎慢無痕者非也。又真角耳邊聽之，集集鳴者良，蘇頌曰：今牛羊諸角，但殺之者聽之，皆有聲，不獨羴羊角也。自死，角則無聲矣。寇宗奭曰：諸角附耳，皆集集有聲，不如羴羊，一說為盡之，然有偽作者，宜察焉。○李時珍曰：羴羊似羊而青色，毛粗，兩角短小，羴羊似吳羊，兩角長大，山驢驢之身而羴之角，但稍大而節疎慢耳。按寰宇志云：安南高石山出羴羊，一角極堅，能

碎金剛石，石出西域，狀如紫石英，百鍊不消，物莫能擊，惟羴羊角扣之，則自然水泮也。又羴骨，偽克佛牙，物亦不能破，用此角擊之，即碎，物性之相畏如此。羴羊皮，西北人以為裘襖，朔方冬天凜冽，非此莫能禦。

麋羊肉味甘平。無毒。食之治惡瘡。和五味炒熟投酒

中。經宿飲之。治筋骨急強。中風。北人恆食。南人食

之。免蛇蟲傷。肺治水腫鼓脹。小便不利。角味鹹寒

無毒。主明目益氣。起陰。去惡血。注下辟蠱毒。惡鬼

不祥。不寐。除邪氣。驚夢。狂越。僻謬。療傷寒。時氣。寒

熱。在肌膚。濕風注毒。伏在骨間。及食噎不通。強筋

骨輕身。利丈夫。治中風筋攣附骨疼痛。作末蜜服。

治卒熱悶。及熱毒痢血。疝氣。摩水塗腫毒。一切熱毒風攻注。中惡毒風卒死昏亂不識人。散產後惡血衝心煩悶。燒末酒服之。治小兒驚癇狂悸。平肝舒筋定風。安魂散血。下氣辟惡解毒。治子癇瘕瘵。

膽味苦寒無毒。治面上黧黯如雀卵色。**鼻**炙研。治五尸遁尸邪氣。

○附方

治難產。以羚羊角刮尖末酒服方寸匕。

山羊

一名羴羊。出西夏。似吳羊而大角。角墮者能陟峻阪。大者如牛。善鬪至死。閩廣山中一種野羊。其皮厚硬不堪炙食。其肉頗肥。○李時珍曰。山羊有二種。一種大角盤環。肉至百斤者。一種角細者。大如驢而羣行。其角甚大。以時墮角。暑天塵露在上。生草戴行。故代都賦云。辨羊。養草以盤桓。

山羊肉味甘熱無毒。男子食之肥軟益人。治勞冷山嵐瘴痢。婦人赤白帶下。療筋骨急強。虛勞益氣。利產婦。不利時疾人。

鹿

處處山林有之。馬身羊尾。頭側而長。高脚而行。速壯者有角。夏至則解。大如小馬。黃質白斑。牝者無角。小而無斑。俗稱麀鹿。孕六月而生子。鹿性淫。一牡常交數牝。謂之聚麀。性喜

食龜能別良草食則相呼行則同旅居則環角外向以防害臥則口朝尾間以通督脉于歲為蒼又五百歲為白又五百歲為玄玄鹿骨亦黑為脯食之可長生也埤雅云鹿乃仙獸自能樂性六十年必懷璫于角下斑痕紫色行則有涎不復急走故曰鹿戴玉而角斑魚懷珠而鱗紫沈存中等談云北狄有駝鹿極大而色蒼黃無斑角大而角有文堅瑩如玉茸亦可用鹿之大者曰麀羣鹿隨之視其尾為準其尾能辟塵拂氈則不蠹置茜帛中歲久紅色不黯也

鹿肉味甘溫無毒主補中益氣力強五臟補虛羸瘦弱調血脉養血生容治產後風虛邪僻九月以後正月已前堪食他月不可食發冷痛白臆者豹文

者竝不可食鹿脯炙之不動及見水而動或曝之不燥者竝殺人不可同野雞肉菱白鮓魚蝦食發惡瘡禮記云食鹿去胃頭肉味甘平治消渴夜夢鬼物煎汁服作膠彌善亦可釀酒蹄肉主諸風脚膝骨中疼痛不能踐地同豉汁五味煮食之。○陶弘景曰野獸之中麀鹿可食氣不腥羶又非十二辰屬八卦無主且溫補於人生死無尤道家許聽為補過其餘雖雞犬牛羊補益於亡魂有愆責竝不足食脂治癰腫死肌溫中四肢不隨頭風通膝

理不可近陰。髓味甘溫。無毒。治丈夫女子傷中絕
脉。筋急痛欬逆。以酒和服之。良。同蜜煮服。壯陽道。
令有子。同地黃汁煎膏服。填骨髓。壯筋骨。補陰強
陽。生精益髓。潤燥澤肌。**腦**入面脂。令人悅澤。刺入
肉內不出。以腦敷之。燥即再上。半日當出。**精**主補
虛羸勞損。**血**主陰痿補虛。止腰痛鼻衄。折傷狂犬
傷。和酒服。治肺痿吐血。及崩中帶下。諸氣痛欲死
者。飲之立愈。大補虛損。益精血。解痘毒藥毒。**腎**味
甘平。無毒。主補腎。補中。安五臟。壯陽氣。作酒。及煮

粥食之。**鹿茸**

嫩角之在肉中者曰茸

味甘溫。無毒。治漏下惡

血。寒熱驚癇。益氣強志。生齒不老。療虛勞洒洒如
瘧羸瘦。四肢酸疼。腰脊痛。小便數利。洩精弱血。破
瘀血在腹。散石淋癰腫。骨中熱疽癢。安胎下氣。殺
鬼精物。久服耐老。又治男子夜夢鬼交。女子崩中
帶下。炙末空心服。方寸匕。壯筋骨。○沈存中筆談
云。月令冬至麋角解。夏至鹿角解。陰陽相反如此。
故麋茸利於補陰。鹿茸利於補陽。今人不辨。以爲
一種誤矣。人自胚胎至成立二十年。骨髓方堅。惟

麋鹿角自生至堅。無兩月之久。大者至二十餘斤。計一日夜。頓生數兩。凡骨之生。無速於此。雖草木易生。亦不及之。此骨之至強者。所以能補骨血。堅陽道。益精髓也。頭者諸陽之會。上鍾於茸角。豈可與凡血為比哉。○孟詵曰。鹿茸不可以鼻嗅之。中有小白蟲。視之不見。入人鼻。必為蟲類。藥不及也。

鹿角

鹿是山獸。屬陽。情淫而遊於山。夏至得陰氣。解角。從陽退之象。麋是澤獸。屬陰。情淫而遊於澤。冬至得陽氣。而解角。從陰退之象也。味鹹温。無毒。治惡瘡癰腫。逐邪惡氣。留血在陰中。除少腹血痛。腰脊痛。折傷惡

血益氣。猫鬼中惡。心腹疼痛。水磨汁服。治脫精尿血。夜夢鬼交。醋磨汁塗瘡瘍。癰腫熱毒。火炙熱熨。小兒重舌。鵝口瘡。蜜炙研末酒服。輕身強骨髓。補陽道。絕傷。又治婦人夢與鬼交者。酒服一撮。即出鬼精。燒灰治女子胞中餘血不盡。欲死。以酒服方寸匕。○李時珍曰。生用則散熱行血。消腫辟邪。熟用則益腎補虛。強精活血。煉霜熬膏。則專於滋補矣。

鹿角膠 鹿角霜

以新鹿角寸截。米泔浸七日。令軟。再盛於長流水中。浸七日。去

麋皮。以東流水桑柴火煮七日。旋旋添水。入醋少許。搗成霜。用其汁加無灰酒。熬成膠。用。味甘

平無毒。主傷中勞絕。腰痛羸瘦。補中益氣。婦人血閉無子。止痛安胎。久服輕身延年。療吐血下血。崩中不止。四肢作痛。多汗淋漓。折跌傷損。炙噉酒服。補虛勞。長肌益髓。令人肥健。悅顏色。又治勞嗽。尿精。尿血。瘡瘍腫痛。骨味甘。微熱。無毒。主安胎下氣。殺鬼精物。久服奈老。可酒浸服之。作酒主內虛續絕。傷補骨。除風。燒灰水服。治小兒洞注。下痢。齒治鼠瘻。雷血。心腹痛。筋治勞損。續絕。塵沙眯目者。嚼爛。接入目中。則粘出。醫治氣瘦。以酒漬炙乾。再浸酒中。含嚙汁味盡。更易。十具乃愈。

○附方

昔西蜀市中。嘗有一道人。貨斑龍丸。又名茸珠丹。每大醉。高歌曰。尾間不禁滄海竭。九轉靈丹都慢說。惟有斑龍頂上珠。能補玉堂關下穴。朝野遍傳之。其方蓋用鹿茸。鹿角膠。鹿角霜也。治頭旋目眩。如立舟車。甚則屋轉眼黑。或見一爲二。用鹿茸半兩。無灰酒三盞。煎一盞。入麝少許。溫服神效。

治胞衣不下。鹿角刮屑三分。薑湯下。

異類有情丸。大補氣血。虛損。凡丈夫中年覺衰。便

可服。餌用龜板酒浸七日。酥炙研。鹿角霜製法見前各

三兩六錢。鹿茸燻乾。酒洗。酥炙研。虎脛骨長流水

浸七日。蜜塗酥炙。各二兩四錢。入雄猪脊髓九條。

煉蜜搗丸。梧子大。每日鹽湯下。七八十九。蓋鹿乃

純陽。龜虎屬陰。血氣有情。各從其類。非金石草木

比也。

治腎虛耳聾。用鹿腰子作羹食之。

麋

鹿屬也。海陵間最多。千百為羣。多牝少牡。與鹿相反。鹿喜山而屬陽。故夏至解角。麋喜澤而屬陰。故冬至解角。狀似鹿而色青黑。大如小牛肉。蹄目下有二竅。為夜目。博物志云。南方麋千百為羣。食澤草。踐處成泥。名曰麋。人因耕獲之。其鹿所息處。謂之鹿場也。今獵人多不分別。往往以麋為鹿。牡者猶可以角退為辨。牝者通目為鹿。鹿矣。

麋肉味甘溫。無毒。主益氣。補五臟不足。治腰腳氣多

食。令人弱。房妊。娠食之。令子目病。不可合猪肉野

雞肉食。發痼疾。同鰕及生菜梅李食。損男子精氣。

脂味辛溫。無毒。治癰腫惡瘡。死肌寒熱。風寒溼痺。

四肢拘緩不收。風頭腫氣。通腠理。柔皮膚。不可近

陰令痿。治少年氣盛。面生瘡。炮。化脂塗之。○李時珍曰。按陸農云。鹿以陽為體。其肉食之。燠。麋以陰為體。其肉食之。寒。故脂令陰痿。肉多食。令人弱。房也。茸味甘溫。無毒。主陰虛勞損。一切血病。筋骨腰膝酸痛。滋陰益腎。角煎膠作霜。法同鹿角。味甘熱。無毒。治風痺。止血。益氣力。添精益髓。煖腰膝。壯陽悅色。療風氣。偏治丈夫。作粉常服。治丈夫冷氣。及風注筋骨疼痛。若卒心痛。一服立瘥。漿水磨。泥塗面。令人光華。赤白如玉。可愛。滋陰養血。功與茸同。○李時珍

曰。鹿之茸。角補陽。右腎精氣不足者宜之。麋之茸。角補陰。左腎血液不足者宜之。乃千古不易之至論也。

骨治虛勞。煮汁釀酒飲。令人肥白。**皮**作靴。鞞除脚氣。

○附方

治吐血。以麋角屑。喫之大效。

麋

生東南山谷。今有山林處皆有之。而均房。湘漢間尤多。乃麋類也。南人往往食其肉。然堅韌不及麋。味美。其皮作履。易勝於諸皮。又有
一種類。麋而大者。名麋。山海經云。女兒之山。多麋。麋即此。○李時珍曰。鹿。麋屬。而小於麋。其口兩邊有長牙。好鬪。其皮為第一。無出其

右者但皮多牙傷痕其聲如擊鼓鈸四方皆有山深處頗多壯者有短角黧色豹脚脚矮而力勁善跳越其行草莽但循一徑皮極細膩靴鞢珍之銀鹿白色施州一種紅鹿色丹

鹿肉味甘平無毒治五痔病燂熟以薑醋進之頭骨

味辛平無毒燒灰飲服治飛尸皮作靴襪除溼氣

脚痺其肉多食動痼疾發疥瘡孕婦食之墮胎

麋深山中有之形大於鹿其肉稍麤

麋肉味甘平無毒功用與鹿肉同

麋

一名麋陂澤淺草中多有之秋冬居山春夏居澤似鹿而小無角黃黑色大者不過二三十斤雄者有牙出口外其皮細軟勝於鹿皮夏月毛毳而皮厚冬月毛多而皮薄也又有

銀麋白色云王者刑罰中理則出

麋肉味甘溫無毒主補五臟益氣力悅澤人面釀酒

有祛風之功八月至十一月食之勝美十二月至

七月食之動氣多食令人消渴若瘦惡者食之發

痼疾不可合鴿肉食成癥疾不可合梅李鰕食病

人。○人心麤豪者以其心肝曝乾為末酒服一具

即便小膽若怯者食之則轉怯不知所為以麋性

最怯飲水見影輒奔道書謂麋鹿無魂也。○孟詵

曰肉同麋肉釀酒良道家以其肉供養名為白脯

云不屬十二辰，不是腥膩。無禁忌也。髓腦主益氣力。悅澤人面。可作酒補下元。骨味甘微温。無毒。治虚損洩精益精髓悅顏色。

○附方

治婦人無乳，麝肉作羹食，勿令婦知是麝肉。

麝

形似麀而小，黑色。麝居山，麀居澤，以此為別。麝生益州雍州山谷，常食栢葉，又啖蛇，其香正在陰莖前皮內，別有膜袋裹之，五月得香，往往有蛇皮骨，今人以蛇蛻皮裹香，云彌香，是相使也。麝夏月食蛇蟲，至寒則香滿，入春臍內急痛，自以瓜剔出，着屎溺中覆之，常在一處不移，絕勝殺取者，然極難得，價同明珠，其香聚處，遠近草木不生，或焦黃也，令人帶

香過園林，則瓜果皆不實，是其驗也。其次臍香，乃捕得殺取之，又有心結香，乃麝見大獸捕逐，驚畏失心，狂走墜死，人有得之，破心見血，流出臍上，作乾血塊者為下，又有一種水麝，其香更奇，臍中皆水，瀝一滴，十斗水十用，洒衣物，其香不歇。唐天寶中，虞人曾一獻之，養於囿中，每以針刺其臍，捻以真雄黃，則臍復合，其香倍於肉麝。近最難得。○談苑云：商汝山中多麝，遺糞常在一處不移，人以是獲之，其性絕愛其臍，為人逐急，即投巖舉爪，剔裂其香，就繫而死，猶拱四足保其臍。故李商隱詩云：投巖麝自香，許渾詩云：尋麝采生香。南中靈貓囊其氣，如麝人以雜之。

麝肉味甘温，無毒。治癥瘕。○孟詵曰：南人常食之，似麝肉而腥氣。云食之不畏蛇毒。臍香味辛温，無毒。

主辟惡氣殺鬼精物。去三蟲。蠱毒。温瘧。驚癇。久服除邪。不夢寤。魘寐。療諸凶邪鬼氣。中惡心腹暴痛。脹急痞滿。風毒去面黧。目中膚翳。婦人產難墮胎。通神仙。通諸竅。療鼻窒。不聞香臭。開經絡。透肌骨。解酒毒。消瓜果食積。治中風。中氣。中惡。痰厥。積聚。癥瘕。麝香不可近鼻。有白蟲入腦。患癩。久帶其香。透關。令人成異疾。

靈貓

一名香狸。生南海山谷。狀如狸。自爲牝牡。南人以作膾炙。如北地狐生法。其氣甚香。微有麝氣。其陰亦如麝功用。略同。楊慎丹鉛錄云。予在大理府見香貓如狸。其文如金錢。

豹。此卽楚辭所謂乘赤豹兮載文狸是也。南山經所謂宜爰之山有獸焉。狀如狸而有髦。其名曰類。自爲牝牡。食者不妬是也。

靈貓肉。味甘温。無毒。食之令人不妬。陰味辛温。無毒。

治中惡氣。飛尸蠱症。心腹卒痛。狂邪神鬼瘧疫氣。

夢寐邪魘。鎮心安神。

狸

一名野貓。處處有之。其類甚多。形頗似貓。其文有二。一如連錢。一如虎文。肉味與狐不相遠。江南一種。牛尾狸。其尾如牛。人多糟食。李時珍曰。狸有數種。大小如狐。毛雜黃黑。有斑如貓。而圓頭大尾者。爲貓狸。善竊雞鴨。其氣臭。肉不可食。有斑如狸。而尖頭方口者。爲虎狸。善食蟲鼠果實。其肉不臭。可食。似虎狸。而尾有黑白錢文。相間者。爲九節狸。皮可

供表領。宋史安陸州貢野貓花貓。即此二種也。有文如豹而作麝香氣者為香狸。即靈貓也。南方有白面而尾似牛者為牛尾狸。亦曰玉面狸。專上樹木食百果。冬月極肥。人多糟為珍品。大能醒酒。人生畜之。鼠皆帖伏不敢出也。一種似貓狸而絕小。黃斑色。居澤中。食蟲鼠及草根者名狽。又登州島上有海狸。狸頭而魚尾也。

狸肉味甘平。無毒。治諸症。溫鬼毒氣。皮中如針刺。作美臙。治痔及鼠瘻。不過三頓甚妙。又能補中益氣。去遊風。正月勿食狸。傷人。內則食狸去正脊。為不利人也。膏治鼯鼠咬人成瘡。用此摩之。并食其肉。

肝治鬼瘧陰莖。治女人月水不通。男子陰癩。燒灰東流水服。頭骨味甘溫。無毒。治風疰尸疰。毒氣在皮中。淫濯如針則著。心腹痛走無常處。及鼠瘻惡瘡。燒灰酒服。治一切遊風。水服。治食野鳥肉中毒。及噎膈不通。飲食。屎燒灰水服。治鬼瘧寒熱。燒灰和臘猪脂。敷小兒鬼舐頭瘡。

○附方

治癩癧久不瘥。用狸頭蹄骨塗酥炙黃為末。每日空心米飲下一錢匕。或癩癧穿破臭爛。用狸骨燒灰傅之。

風狸

生邕州以南，似兔而短，棲息高樹上，候風而吹至他樹食果子，其尿如乳，甚難得，人取養之，乃可得。○李時珍曰：風狸生嶺南及蜀西徼外山林中，其大如狸，如獺，其狀如猿，猴而小，其目赤，其尾短如無，其色青黃而黑，其文如豹，或云一身無毛，惟自鼻至尾一道有青毛，廣寸許，長三四分，其尿如乳汁，其性食蜘蛛，亦啖藁陸香，晝則踈伏不動，如蠅，夜則因風騰躍甚捷，越巖過樹，如鳥飛空中，人網得之，見人則如羞而叩頭乞憐之態，人撻擊之，倏然死矣，以口向風，須臾復活，惟碎其骨，後其腦乃死，一云刀斫不入，火焚不焦，打之如皮囊，雖鐵擊其頭破，得風復起，惟石菖蒲塞其鼻，即死也，一云此獸常持一杖，指飛走，悉不能去，見人則棄之，人獲得擊打至極，乃指示人，人取以指物，令所欲如意也，二說見十洲記及嶺南南志，未審然不。

風狸肉味甘平，無毒，食之已風，腦酒浸服，愈風疾，和

菊花服至十斤，可長生，尿亦治諸風。

狐

江南時有之，汴洛極多，形似小黃狗而鼻尖尾大，其性多疑，審聽善為魅，捕者多用置，北土作鱸生食之。○李時珍曰：狐南北皆有之，有黃黑白三種，日伏於穴，夜出竊食，聲如嬰兒，氣極臊烈，毛皮可為裘，其腋毛純白，謂之狐白，許慎云：妖獸鬼所乘也，有三德，其色中和，小前大後，死則首丘，或云狐知上伏，不度阡陌，或云狐善聽水，或云狐有媚珠，或云狐至百歲，禮北斗而變化，男女媾婦以惑人，又能擊尾出火，或云狐魅畏狗，千年老狐，惟以千年枯木然照，則見真形，或云犀角置穴，狐不敢歸，山海經云：青丘之山有狐，九尾能食人，人食之不蠱，狐魅之狀，見人或又手有禮，有祗揖無度，或靜處獨語，或裸形見人，百端

怪誕也

狐肉味甘温。無毒。煮炙食。補虛損。及五臟邪氣。患蠱寒熱者。宜多食之。作膾生食。煖中去風。補虛勞。同腸作臠食。治瘡疥久不瘥。禮記云。食狐去首。為害人。也。五臟及腸肚味苦。微寒。有毒。治蠱毒寒熱。小兒驚癇。補虛勞。隨臠而補。治惡瘡疥。生食治狐魅。作羹臠。治大人見鬼。肝燒灰。治風癇。及破傷風口。緊搐強。膽人卒暴亡。即取雄狐膽。温水研灌。入喉即活。移時者無及矣。又能辟邪。瘧解酒毒。陰莖味

甘微寒。有毒。治女子絕產。陰中癢。及陰脫。小兒陰

癩。卵腫。頭燒之。辟邪。同狸頭。燒灰。傅瘰癧。目治破

傷。中風鼻。治狐魅病。同豹鼻。煮食。唇治惡刺入肉

杵爛。和鹽封之。口中涎液。取法。小口瓶盛肉。置狐

於上。涎入瓶。入媚樂。四足。主痔漏下血。皮辟邪魅

尾。燒灰。辟惡。雄狐屎。尖頭。燒之。辟惡。去瘟疫氣。治

肝氣心痛。顏色蒼蒼如死灰。喉如喘息者。以二升

燒灰。和薑黃三兩搗末。空腹酒下方寸匕。日再甚

效。療惡刺入肉。燒臘月豬脂調塗之。

○附方

狐肉羹。治驚癇恍惚。語言錯謬。歌笑無度。用狐肉一斤及五臟治淨。入五味煮作羹食之。妙。

治牛病。狐腸燒灰水灌之。

貉

音鶴。生山野間。狀如狸。頭銳鼻尖。斑色。其毛深厚溫滑。可為裘服。與獾同穴而異處。日伏夜出。捕食蟲物。出則獾隨之。其性好睡。人或蓄之。以竹叩醒。已而復寐。故人好睡者。謂之貉睡。俗作瞌睡。謬矣。但人又言其非好睡。乃耳聾也。故見人乃知趨走。貉踰汝則死。土氣使然也。

貉肉味甘溫。無毒。主五臟虛勞及女子虛憊。

獾

音湍。一名猪獾。處處山野間有之。穴居。狀似小豬。狹形體肥而行鈍。其耳聾。見人乃走。短足短尾。尖喙。褐毛。能孔地入。蟲蟻瓜果。為其所啖。其肉微帶土氣。皮毛不如狗獾。獾與獾自是兩種。或以為一物。誤矣。

獾肉味甘酸平。無毒。治水脹久不瘥。垂死者。作羹食

之。下水大效。服丹石動熱。下痢赤白。久不瘥。煮肉

露一宿。空腹和醬食。一頓。即瘥。瘦人煮和五味食。

長肌肉。寇宗奭曰。野獸中惟獾肉最甘美。益瘦人

治上氣虛乏。欬逆勞熱。和五味煮食。膏治螻螂蠱

毒。胸中哽噎。慌慌如蟲行。欬血。以酒和服。或下或

吐。或自消也。胞治蠱毒。以臘月乾者。湯摩如雞子許。空腹服之。骨治上氣欬嗽。多研酒服。三合日三取瘥。

獾

音歡。一名狗獾。處處山野有之。穴土而居。形如家狗。而脚短。食果實。有數種。相似。其肉味甚甘美。皮可為裘。○李時珍曰。獾猪獾也。狗獾也。二種相似。而略殊。狗獾似小。狗而肥。尖喙矮足。短尾深毛。褐色。皮可為裘。領亦食。蟲蟻瓜果。又遼東女直地面有海獾。皮可供衣裘。亦此類也。

獾肉味甘酸平。無毒。主補中益氣。殺虻蟲。小兒疳瘦。

宜食之。其他功與貓同。

木狗

李時珍曰。按熊太古冀越集云。木狗生廣東左右江山中。形如黑狗。能登木。其皮為衣。襦能運動血氣。元世祖有足疾。取以為袴。人遂貴重之。此前所未聞也。珍嘗聞蜀人言。西川有玄豹。大如狗。黑色。尾亦如狗。其皮作裘。襦甚煖。冬月遠行。用其皮包肉食。數日猶溫。彼土亦珍貴之。此亦木狗之屬也。

木狗肉味甘酸溫。無毒。主溫中。辟寒溼。皮除腳痺風。

溼氣。活血脈。煖腰膝。

豺

音儕。處處山中有之。狼屬也。形似狗。而頗白。前矮後高。而長尾。其體細瘦。而健猛。其毛黃。褐色。而鬣鬣。其牙如錐。而噬物。羣行。虎亦畏之。又喜食羊。其聲如犬。人惡之。以為引魅。不祥。其氣臊臭。可惡。羅願云。世傳狗為豺之舅。見狗輒跪。亦相制耳。

豺肉味酸熱有毒食之無益損人精神消人脂肉令人瘦皮治冷痺軟脚氣熱之以纏裹病處即瘥者汁飲或燒灰酒服療諸痔痢亦可傳蠹齒瘡又和酒灌劣牛惡馬便馴良附人治小兒夜啼百法不效同狼屎中骨燒灰等分水服少許即定。

狼

李時珍曰狼豺屬也處處有之北地尤多人喜食之其居有穴其形大如犬而銳頭尖喙白頰駢脇高前廣後脚不甚高能食雞鴨鼠物其色雜黃黑亦有蒼灰色者其聲能大能小能作兒啼以魅人野狸尤惡其冬鳴其腸直故鳴則後竅皆沸而糞為烽煙直上不斜雖有狂風不散故軍情緊急燒之則援兵四集其性善顧而食戾踐藉人有犯盜燒其筋

熏之即脚攣縮因之獲賊也昔有段祐失金帛集奴婢於庭焚之一婢臉肉爛跳訊之乃竊物者物性通靈可為異矣○狼足前短知食所在狼足後短負之而行故曰狼狽

狼肉味鹹熱無毒主補益五臟厚腸胃填骨髓腹有

冷積者宜食之膏補中益氣潤燥澤皴塗諸惡瘡

牙佩之辟邪惡氣刮末水服治狂犬咬燒灰水服

方寸匕治食牛中毒喉膈治噎病日乾為末每以

半錢入飯內食之皮煖人辟邪惡氣嗉下皮搓作

條勒頭能去風止痛尾繫馬胸前辟邪氣令馬不

驚屎治療癰燒灰油調封之又治骨鯁不下燒灰

水服之。屎中骨。治小兒夜啼。燒灰水服。二黍米大。即定。又能斷酒。

兔

一名明視。言其目不瞬而瞭然也。梵書名爲舍迦。蘇頌曰。兔處處有之。爲食品之上味。李時珍曰。兔大如狸而毛褐。形如鼠而尾短耳大而銳。上唇缺而無脾。長鬚而前足短。尻有九孔。跌居趨捷善走。舐雄毫而孕。五月而吐子。其大者爲兔。音綽似兔而大。青色首與兔同。足與鹿同。或謂兔無雄而中秋望月以孕者。不經之說也。今雄兔有二卵。古樂府有雄兔脚撲速。雌兔眼迷離。可破其疑矣。王物簿云。孕環之兔。懷於左腋。毛有文采。至百五十年。環轉於腦。能隱形也。王延相雅述云。兔以潦則化爲鼈。鼈以旱則變成兔。熒或不明。則雉。生兔。

兔肉。味辛平。無毒。主補中益氣。熱氣溼痺。止渴健脾。

涼血解熱毒。利大腸。炙食。壓丹石毒。臘月作醬食。

治小兒豌豆瘡。又治消渴。內則云。食兔去尻。不利。

人也。兔肉爲羹。益人。妊娠不可食。令子缺唇。不可。

合白雞肉及肝心食。令人面黃。合獾肉食。令人病。

遁尸。與薑橘同食。令人心痛霍亂。又不可同芥菜。

食。○陳藏器曰。兔尻有孔。子從口出。故妊婦忌之。

非獨爲缺唇也。大抵久食。絕人血脈。損元氣。陽事。

令人痿黃。八月至十月可食。餘月傷人神氣。兔死。

而眼合者。殺人。寇宗奭曰。兔者明月之精。色白者得金氣之全。尤妙。李時珍曰。兔至冬月斲木皮。已得金氣而氣內實。故味美。至春食草麥而金氣衰。故不及也。血味鹹寒。無毒。主涼血。活血。解胎中熱毒。催生。易產。腦塗凍瘡。催生滑胎。骨主熱中。消渴。止霍亂吐痢。煮汁服。醋摩塗瘡疥。頭骨味甘酸平。無毒。治頭眩痛癩疾。連皮毛燒存。性米飲服。方寸七。治天行嘔吐不止。酒服。治婦人難產及產後餘血不下。又傳婦人產後陰脫。癰疽惡瘡。肝主明目。

補勞。治頭旋眼眩。切洗生食。如羊肝法。治丹石毒發上衝。目暗不見物。皮毛燒灰酒服。方寸七。治產難及胞衣不出。餘血捨心。脹刺欲死者。極驗。皮灰。

治婦人帶下。頭皮灰。治鼠瘦。毛灰。治小便不利。尿。

一名明月砂。一名翫月砂。去目中浮翳。勞瘵五疳。疳瘡痔瘻。殺。

蟲解毒。按沈存中良方云。江陰萬融病勞。四體如。

焚。寒熱煩躁。一夜夢一人腹擁。一月光明。使人心。

骨皆寒。及寤而孫元規使人遺藥。服之遂平。扣之。

則明月丹也。乃悟所夢筆頭灰。上古殺青書竹帛。至秦蒙恬以兔毫。

作筆治病不以新而用敗者取其沾濡膠墨也。水服治小便不通陰腫脫

肛。酒服二錢治男子交媾莖萎女人臨產艱難漿

飲服。治咽喉痛不下食。

○附方

明月丹。治勞瘵追蟲。用兔屎四十九粒。硃砂如兔

屎大四十九粒為末。生蜜丸梧子大。月望前以水

浸甘草一夜。五更初取汁送下。七丸有蟲下。急鉗

入油鍋內煎殺。不然此蟲極惡恐延入他人耳鼻

中為患也。三日內不下再服。

山獺。李時珍曰。山獺出廣之宜州。嶮峒及南丹

州。土人號為插翹。其性淫毒。山中有此物。凡牝獸皆避去。獺無偶。則抱木而枯。狻女春

時成羣入山。以采物為事。獺聞婦人氣。必躍

來抱之。刺骨而入。牢不可脫。因扼殺之。負歸

取其陰一枚。直金數兩。若得抱木死者。尤奇

貴。峒獺甚珍重之。私貨出界者。罪至死。然本

地亦不常有。方士多以鼠璞猴胎偽之。試之

之法。但令婦人摩手極熱。取置掌心。以氣呵

之。即趨然而動。蓋陰氣所感也。此說出范石

山獺肉。味甘温。無毒。主補元氣。扶命門。陰莖主陽虛

陰痿。精寒而清者。酒磨少許服之。獺人以為補助

要藥。骨解藥。箭毒。研少許敷之。立消。

水獺

江湖溪澤多有之，四足俱短，頭與身尾皆

食魚居水中，亦依木上，嘗縻置大水囊中，在

內旋轉如風，水皆成旋渦，西戎以其皮飾毳

服裙袖，云垢不染，著如風霾，眯目，但就拭之

即去。李時珍曰：獺狀似青狐而小，毛色青

黑，水居食魚，能知水信為穴，鄉人以占潦旱

如鵲巢，知風也。古有熊食鹽而死，獺飲酒而

斃之語，物之性也。今川沔漁舟，往往馴畜，使

之捕魚甚捷，或云獺無雌，以獾為雌，故曰

獾鳴而獺候。

水獺肉味甘鹹寒，無毒。煮汁飲，療疫氣溫病，及牛馬

時行病，水氣脹滿，熱毒風骨蒸熱勞，血脈不行，榮

衛虛滿，及女子經絡不通，血熱大小腸秘，消男子

陽氣不宜多食，不可合兔肉食。

肝 諸畜肝葉皆有定數，惟獺肝一

月一葉，如以季冬，剖視，當有十二葉也。

味甘溫，有毒。

肉及他臟皆治寒，惟肝溫也。

鬼疰蟲毒，止久嗽，除魚鱉，竝燒灰酒服之。又治傳

尸勞極虛汗客熱，四肢寒熱及產勞殺蟲。葛洪云

尸疰鬼疰，乃五尸之一。又挾諸鬼邪為害，其病變

動，乃有三十六種，至九十九種，大略使人寒熱沉

沉默默，不知病之所苦，而無處不惡，積年累月淹

滯，至死死後傳人，乃至滅門，覺有此候，惟以獺肝

一具，陰乾為末，水服方寸匕，日三，以瘥為度。又按

朝野僉載云。五月五日午時。急斫一竹。竹節中必有神水。瀝取和獺肝為丸。治心腹積聚病。甚效也。
 [腎]主益男子。[膽]味苦寒無毒。治目翳黑花。飛蠅上下。視物不明。入點藥中。古語云。蟾肪軟玉。獺膽分杯。謂以膽塗竹刀。畫杯底。酒即中分也。嘗試之不驗。蓋妄傳耳。但塗杯唇。使酒稍高於盞面耳。髓去疤痕。按集異記云。吳主鄧夫人為如意傷頰。血流啼叫。太醫云。得白獺髓。雜玉與琥珀。傅之。當滅此痕。遂以白金購得白獺。合膏而痊。但琥珀太多。猶有赤點如痣。骨含之下。魚骨鯁。煮汁服。治嘔噦不止。足治手足皴裂。煮汁服。治魚骨鯁。并以瓜爬喉下。為末酒服。殺勞蟲。皮毛煮汁服。治水瘡病。亦作褥及履屨着之。產母帶之。易產尿。治魚臍瘡。研末水和敷之。膿出痛止。治下痢。燒末。清旦服一小盞。三服愈。赤用赤糞。白用白糞。又治驢馬蟲。及牛疫疾。研水灌之。

○附方

治手足跌打折傷。水獺一个。支解入罐內。鹽泥固

濟煨存性為末，以黃米煮粥攤患處，搽獺末於粥上，布裹之，立止疼痛，傷處自然平復。

治人有鬼魅邪祟之病，獺肝末，水服方寸匕，日三

治大便下血不止，用獺肝一副，煮熟入五味食之。

治月水不通，獺肝丸，用乾獺胆一枚，乾狗胆，硃砂

川椒去目，炒去汗，各一分，水蛭炒黃十個，為末，醋

糊丸，菉豆大，每服五丸，當歸酒下，日一服，以效為

度。

治痔血，獺肝燒末，水服一錢。

海獺

生海中，形似獺而大如犬，脚下有皮如豚，毛着水不濡，人亦食其肉，又以其皮為風領，云亞於貂，博物志云，海獺頭如馬，自腰以下似蝙蝠，其毛似獺，大者五六十斤，亦可

烹食

海獺味鹹甘平，無毒，食之消腫，及癭瘤邪氣，結核骨

燒灰服，治鼓脹腫滿。

膾肭獸

一名海狗，生西番突厥國，胡人呼為阿慈，勃他你，其狀似狐而大，長尾，膾似麝香，臨海志云，出東海水中，狀若鹿形，頭似狗，長尾，每日出，即浮在水面，崑崙家以弓矢射之，取其外腎，陰乾百日，味甘香美也，蘇頌曰，今東海旁亦有之，舊說似狐長尾，今滄州所

圖，乃是魚類，而豕首，兩足，其膾紅紫色，上有紫斑點，全不相類，異魚圖云，試其膾於臘月

衝風處置孟水浸之不凍者為真也雷斅曰
 膾肭臍多偽者海中有獸號曰水鳥龍取其
 腎以克膾肭臍其物自別真者有一對兩重
 薄皮裹九核皮上有肉黃毛一穴三莖收之
 器中年年溼潤如新或置睡犬頭上其犬忽
 驚跳若狂者為真也寇宗奭曰今出登萊州
 其狀非狗非獸亦非魚也但前脚似獸而尾
 即魚身有短密淡青白毛毛上有深青黑點
 久則亦淡腹脇下全白色皮厚韌如牛皮邊
 將多取以飾鞍韉其臍治腹臍積冷脾腎勞
 極有功不待別試也似狐長尾之說今人多
 不識之李時珍曰按唐書云膾肭獸出遼西
 營州及結骨國一統志云膾肭臍出女直及
 三佛齊國獸似狐脚高如犬走如飛取其腎
 漬油名膾肭臍觀此則似狐之說非無也蓋
 似狐似鹿者其毛色爾似狗者其足形也似
 狐者其尾形也用外腎而曰臍者連臍取之
 也又異物志膾肭獸出朝鮮似狸蒼黑色無

前兩足能捕鼠郭璞云晉時召陵扶夷縣獲
 一獸似狗豹文有角兩脚據此則膾肭有水
 陸二種而藏器所謂似
 狐長尾者其此類歟
 一名海
 狗腎
 味鹹大熱無毒治鬼氣尸疰鬼魅狐
 膾肭臍

魅夢與鬼交心腹痛中惡邪氣宿血結塊痲癩男
 子精冷無嗣五勞七傷陰痿少力

鼠類

鼠

李時珍曰鼠形似兔而小青黑色有四齒而
 無牙長鬚露眼前爪四後爪五尾文如織而
 無毛長與身等五臟俱全肝有七葉膽在肝
 之短葉間大如黃豆正白色貼而不垂惠州
 獠民取初生閉目未有毛者以蜜養之用獻
 親貴夾而食之聲猶唧唧謂之蜜唧淮南子

云鼠食巴豆而肥食鹽而身輕食砒而即死抱朴子云鼠壽三百歲善憑人而卜名曰仲能知一年中吉凶及千里外事鼠類頗繁附其略於下(鼯鼠)其大如拳其文如豹漢武帝曾獲之(鼯鼠)數萬相銜而行草木子以為鼠妖者此也(鼯鼠)大如蠶豆即今地鼠也(水鼠)穴水傍岸隙似鼠而小食菱芡魚鰕水鼠生北荒積冰下皮毛甚柔可為席臥之却寒食之已熱(火鼠)出西域及南海火州其山有野火春夏生秋冬死鼠產於中甚大毛可為布汙則燒之即潔名火浣布(鼯鼠)隴西首陽山之西南有鳥鼠同穴其鳥為鴉狀如家雀而黃黑色其鼠為鼯狀如家鼠而小色黃尾短鳥居穴外鼠居穴內(鼯鼠)北方有比肩獸與叩叩巨虛比為嚙甘草有難叩叩巨虛負之而走李時珍曰今契丹及交河北境有以兔頭目毛色皆似兔而瓜足似鼠前足僅寸許後足近尺尾亦長其端有毛一跳數尺止即

鼯鼠也此即鼯鼠也土人捕而食之

牡鼠肉味甘温無毒炙食之治小兒哺露大腹又主

骨蒸勞極四肢勞瘦殺蟲療踈折續筋骨生擣傅

之煎膏治瘡癩肝治箭鏃不出搗塗之聾耳出汗

每用棗核大乘熱塞之能引蟲也膽治目暗點之

治青盲雀目不見物滴耳治聾鼠印即外腎也令人媚

悅岫嶼神書云雄鼠外腎之上有文似印兩腎相

對有符篆朱文九轉者尤佳以正旦或端午或七

日子時面北向子位刮取陰乾佩於青囊中男左

鼯鼠

處處田隴間多有之月令曰鼠化為鴽者即此肥而多膏早歲頗為田害○陳藏器

曰鼯鼠陰穿地中而行見日月光則死於深山林木下土中有之○李時珍曰隆慶辛未

夏秋大水斬黃瀕江之地鼯鼠遍野皆櫛魚所化蘆稼之根嚙食始盡則田鼠之化不獨

月令所云一種也

鼯鼠肉味鹹寒無毒燔食之去風瘡癰疽諸瘻蝕瘡

陰匿爛瘡疥癩痔瘻治風熱久積血脈不行結成

癰疽可消小兒食之殺蛇蟲膏主摩諸瘡集治蛇

虺螫傷研末猪脂油調塗

隱鼠

陶弘景曰諸山林中有獸大如水牛形似猪灰赤色下脚似象胸前尾上皆白有力

而鈍名曰隱鼠人取食之肉亦似牛多以作脯乃云是鼠王其精溺一滴落地輒成一鼠

災年則多出也陳藏器曰此是獸類非鼠之儔大如牛而前脚短皮入鞣轡用莊子所謂

鼯鼠飲河不過滿腹者陶言是鼠王精溺成鼠遍訪山人無其說亦不能土中行此乃妄

傳陶誤信爾蘇頌曰隱鼠出滄州及胡中似牛而鼠首黑足大者千斤多伏於水又能堰

水放沫彼人食其肉○李時珍曰按異物志云隱鼠頭脚似鼠口銳蒼色大如水牛而畏

狗見則主水災晉書云宣城郡出隱鼠大如牛形似鼠禱脚類象而驢蹄毛灰赤色胸前

尾上白色有力而鈍金樓子云晉寧縣境出大鼠狀如牛土人謂之偃牛時出山遊毛落

田間悉成小鼠苗稼盡耗梁書云倭國有山鼠如牛又有大蛇能吞之據此則隱鼠非無

而陶說有本諸家闢之太甚者未深究耳又爾雅云隱鼠一名鼯身似鼠而馬蹄長鬚而

獸部

賊一歲千斤秦人謂之小驢者即此物也

隱鼠肉味甘平無毒食之補脾膏治一切痔瘻惡瘡

腫毒

鼯鼠

李時珍曰鼯鼠處處有之居土穴樹孔中形大於鼠頭似兔尾有毛青黃色善鳴能人立交前兩足而舞好食粟豆與鼯鼠俱為田害鼯鼠小居田而鼯大居山也范成大云賓州鼯鼠好食山豆根故食之可治咽喉熱症

鼯鼠肉味甘平無毒治咽喉痺痛一切熱氣含口中

嚙汁神效

竹鼯

食竹根之鼠也出南方居土穴中大如兔人多食之味如鴨肉燕山錄云煮羊以鼯

煮鼯以蚊物性相制也

竹鼯肉味甘平無毒主補中益氣解毒

土撥鼠

蒙古人稱為答刺不花生西番山澤間穴土為居形如獾夷人掘取食之魏志云大秦國出辟毒鼠近似此也○李時珍曰皮可為裘甚煖溼不能透

土撥鼠肉味甘平無毒者食肥美治野雞瘻瘡按飲

膳正要云多食難尅化微動風頭骨治小兒夜臥

不寧懸之枕邊即安

貂鼠

出丁零國今遼東高麗及女直鞞鞞諸胡皆有之大如獺而尾粗其毛深寸許紫黑色蔚而不耀用皮為裘帽風領寒月服之得風更煖着水不濡得雪即消拂面如焰拭眯

即出亦奇物也。惟近火則毛易脫。漢制侍中冠金璫飾首前插貂尾。加以附蠟。取其內勁而外溫。毛帶黃色者為金貂。白色者為銀貂。

貂鼠肉味甘平。無毒。治脾胃寒洩。溫補元氣。毛皮主

塵沙眯目。以裘袖拭之即去。

黃鼠

李時珍曰。黃鼠出太原大同延綏及沙漠諸地。皆有之。遼人尤為珍貴。狀類大鼠。黃色而足短。善走極肥。穴居有土窖如牀榻之狀者。則牝牡所居之處。晴煖則出坐穴口。鬼人則交其前足拱而如揖。乃竄入穴。即詩所謂相鼠有體。人而無禮。故又名禮鼠。韓文所謂禮鼠拱而立者也。秋時畜豆粟草木之實以禦冬。各為小窖。別而貯之。村民以水灌穴而捕之。味極肥美。如豚子而脆。皮可為裘。獮遼金元時。以羊乳飼之。用供上膳。以為珍饈。

千里贈遺。今亦不甚重之矣。最畏鼠狼。能入穴銜出也。北胡又有青鼠。皮亦可用。銀鼠。白色如銀。抱朴子言南海白鼠。重數斤。毛可為布也。百感錄云。西北有獸類黃鼠。短喙無尾。性狡善聽。聞人足音輒逃匿。不可卒得。土人呼為瞎撞。亦黃鼠類也。

黃鼠肉味甘平。無毒。食之主潤肺生津。多食發瘡。煎

膏貼瘡。解毒止痛。

○附方

經驗良方有靈鼠膏。治諸瘡腫毒。止痛退熱。用大

黃鼠一箇打死。清油一斤。慢火煎熬。水上試。油不

散。乃濾滓澄清。再煎。次入炒紫黃丹五兩。楊柳枝

不住手攪勻滴水成珠。下黃蠟一兩熬黑乃成。去火毒三日如常攤貼。

鼪鼠

一名黃鼠狼處處有之狀似鼠而身長頭如小狗尾大黃色帶赤其氣極臊臭性好竊食雞鴨村野人家最受其害畏狗逐之急便撒屁數十滿室惡臭不可嚮其毫與尾可作筆嚴冬用之不折不扣世謂鼠鬚栗尾者是也

鼪鼠肉味甘臭温有小毒食之解老雞肉毒煎油塗

瘡疥殺蟲心肝味臭微毒主心腹痛殺蟲

猬

吳人俗稱偷瓜蟻以其常潛瓜畦中好食瓜也。○陶弘景曰猬處處有之見人便藏頭足其毛尖利中空如骨捕之卒不可得能跳入虎耳中而見鵲便自仰腹受啄物之相制如

此其脂焯鐵中入些少水銀則柔如鉛錫。○李時珍曰猬之頭背似鼠刺毛似豪猪捲縮則形如芡房及栗房攢毛外刺尿之即開炙穀子云刺端分兩頭者為猬如棘針者為蝮似猬而赤尾者名暨居冠宗奭曰乾猬皮連刺作刷治紙帛絕佳

猬肉味甘平無毒炙食補下元理胃氣令人能食炙

黃食或者煮汁飲治反胃又主瘦瘡脂治腸風瀉血

可煮五金八石伏雄黃柔鐵溶滴耳中治聾塗禿

瘡疥癬殺蟲腦治狼瘦心肝治蟻蜂等瘦瘰癧惡

瘡燒灰酒服一錢膽點目止淚化水塗痔瘡骨人

誤食之令瘦劣骨節漸小也皮治五痔陰蝕下血

赤白五色血汁不止。陰腫痛引腰背。酒煮殺之。療腹痛疝積。燒灰酒服。吹鼻止衄血。解一切藥力。用之。

○附方

治眼睫倒刺。猬刺棗針白芷青黛等分爲末。隨左右目嚙鼻中。口含冷水。

治虎爪傷人。刺猬脂日日傅之。內服香油。

治脫肛。猬皮一斤燒。磁石五錢煨。桂心五錢爲末。每服二錢米飲下。

猴類

獼猴

一名胡孫。一名沐猴。一名馬雷。一名狙。梵書名之曰摩斯咤。李時珍曰。按班固白虎

通云。猴者候也。見人設食伏機。則憑高四望。善於候者也。猴好拭面如沐。故謂之沐。而後人訛沐爲母。又訛母爲獼。愈訛愈謬矣。猴形似番人。故曰胡孫。莊子謂之狙。養馬者廐中畜之。能辟馬病。故又稱馬雷云。○唐慎微曰。獼猴有數種。總名曰禺屬。按抱朴子云。猴八百歲變爲猿。猿五百歲變爲玃。玃千歲變爲蟾蜍。○李時珍曰。猴處處深山有之。狀似人。眼如愁胡。而頰陷有嚙音。歉藏食處也。腹無脾。以行消食。尻無毛。而尾短。手足如人。兩耳亦酷肖人者。能豎行。聲略略若款。孕五月而生子。生子多浴於澗。其性躁動。害物。畜之者使坐杙上。鞭撻旬月。乃馴也。其類有數種。小而尾短者。猴也。似猴而多鬚者。虞也。音據。建

平山中有之，大如狗，狀如猴，黃黑色，多鬚鬣，好奮頭，舉石擲人。西山經云：崇吾之山，有獸焉，狀如禺而長臂，善投，名曰舉父。即此也。似猴而大者，獲也。音却，老猴也。生蜀西徼外山中，似猴而大，色蒼黑，能人行，善攫持人物，又善顧盼，故謂之獲。純牡無牝，故又名獲父。善攝人，婦女為偶，生子，又神異。經云：西方有獸名曰獫狁，狀如猴，善緣木，純牝無牡。羣居要路，執男子合之而孕，此亦獲類。而牝牡相反者，大而尾長赤目者，禺也。小而尾長仰鼻者，狽也。似狽而大者，果然也。似狽而小者，蒙頰也。紫黑色，出交趾，畜以捕鼠，勝於貓狸。似狽而善跳躍者，獬狁也。黑身白腰，如帶，手有長毛，白色，似握版之狀。蜀志云：獬狁似猴而甚捷，在樹上，歛然騰躍如飛也。似猴而長臂者，猿也。善援引，故謂之猿。俗作猿，非產川廣深山中，似猴而長大，其臂甚長，能引氣，故多壽。臂骨作笛，甚清亮，其色有青白玄黃緋數

種，其性靜而仁慈，好食果實，其居多在林木，能越數丈，著地即洩瀉死，惟附于汁飲之可免。其行多羣，其鳴善啼，一鳴三聲，淒切入人肝脾。廣人言猿，初生毛黑，雄者老則變黃，潰去勢囊，轉雄為雌，與黑者交而孕，數百歲，黃又變白也。似猿而金尾者，狨也。似猿而大，能食猿，猴者，獨也。其性喜獨，一鳴即止，能食猿猴，故諺曰：獨一鳴而猿散，獨夫之義。蓋取諸此，或云即黃腰也。又見虎下。

獼猴肉，味酸平，無毒，作脯食，治久瘧，辟瘴疫，治諸風

勞。釀酒彌佳。○李時珍曰：異物志言南方以獼猴

頭為鮓。臨海志言粵民喜啖猴頭羹。又巴徼人捕

猴，鹽藏，火熏食，云甚美。頭骨治瘴瘧，作湯浴治小

兒驚癇寒熱鬼魅邪氣手治小兒驚癇口禁屎塗
蜘蛛咬小兒臍風撮口及急驚風燒末和生蜜少

許灌之皮治馬疫氣馬經言馬廐畜猴辟馬瘟疫

逐月有天癸流草上馬食之永無疾病矣。

狻

一名狻生山南山谷中似猴而大毛長黃赤
色人將其皮作鞍褥楊億談苑云狻出川峽
深山中其狀大小類猿長尾尾作金色輕捷善
緣木甚愛其尾人以藥矢射之中毒即自嚙
其尾也宋時文武三品以上
許用狻座以其皮為褥也

狻肉及血食之調五痔病久坐其皮亦良脂瘡疥塗

之妙。

果然

一名禺一名狻一名雌果然自呼其名人
捕其一則舉羣啼而相赴雖殺之不去也

謂之果然以來之可必也大者為然為禺小
者為狻為雌案南州異物志云交州有果然

獸其名自呼狀大於猿其體不過三尺而尾
長過頭鼻孔向天雨則挂木上以尾塞鼻孔

其毛長柔細滑白質黑文如蒼鴨脇邊斑毛
之狀集之為裘褥甚溫暖○李時珍曰果然

仁獸也出西南諸山中居樹上狀如猿白面
黑頰多髯而毛采斑斕尾長於身其末有岐

兩則以岐塞鼻也喜羣行老者前少者后食
相讓居相愛生相聚死相赴柳子所謂仁讓

孝慈者是也古者畫雌為宗彝亦取其倫理
之義也其性多疑見人則登樹上下不一甚

至奔觸破頭折脛故人以此心疑
不決者而俗呼駮愚為癡獼也

果然肉味鹹平無毒同五味煮臠食之治寒熱瘡瘻

併坐其皮取效。○李時珍曰：案鍾毓果然賦云：似猴象猿，黑頰青身。肉非嘉品，惟皮可珍。而呂氏春秋云：肉之美者，獾豸之炙，亦性各有不同耶。

猩猩

李時珍曰：猩猩出哀牢夷，及交趾封溪縣山谷中，狀如狗及獼猴，黃毛如猿，白耳如豕，人面人足，長髮，頭顱端正，聲如兒啼，亦如犬吠，成隊羣行，俚人以酒置道側，更設草屐於傍，猩猩見即呼人，祖先姓名罵之而去，頃復相與嘗酒，著屐，因而被擒，檻而養之，將烹則推其肥者泣而遣之，西胡取其血染毛罽，不黯，刺血必箠而問其數，至一斗方已，又博物志云：日南有野女，羣行覓夫，其狀白色，褊體無衣，襦齊東野語云：野婆出南丹州，黃髮椎髻，裸形跣足，儼然若一媪也。羣雌無牡，上下山谷如飛，猱自腰已下，有皮蓋膝，每遇男

子必負去求合，嘗為健夫所殺，死以手護腰間，剖之得印方寸，瑩若蒼玉，有文類符篆也。案雄鼠卵有文如符篆，治易腋下有鏡印，則野婆之印，篆非異也，亦當有功用，但人未知耳。

猩猩肉味鹹温，無毒，食之不味不飢，令人善走，窮年無厭，可以辟穀。古人以為珍味，呂氏春秋云：肉之美者，獾豸之唇，猩猩之炙是矣。

狒狒

音費，一名鬻鬻，狒同，一名梟羊，出西南夷，其形如人，被髮迅走，食人。山海經云：梟羊人面長唇，黑身有毛，反踵，見人則笑笑，則上唇掩目。郭璞云：交廣及南康郡山中，亦有此物，犬者長丈餘，俗呼為山都。宋建武中，獠人進雌雄二頭，帝問土人丁鑾，鑾曰：其面似人。

紅赤色，毛似獼猴，有尾，能人言，如鳥聲，善知
生死，力負千鈞，反踵無膝，睡則倚物，獲人則
先笑而後食之，獵人因以竹筒貫臂，誘之，候
其笑時，抽手以錐釘其唇，着額，候死而取之，
髮極長，可為頭髮，血堪染靴及緋，飲之使人
見鬼也，帝乃命工圖之，方輿圖志云：狒狒，西
蜀及處州山中有之，呼為熊人，亦食其掌，
割其皮，閩中沙縣幼山亦有之，長丈餘，逢人
則笑，呼為山大人，又南康記云：山都形如崑
崙人，通身生毛，見人輒閉目，開口如笑，好在
深澗中，翻石覓蟹食之。

狒狒肉味甘平，無毒，作脯食之，補五臟，不飢延年，連
脂薄割炙熟，貼人癬疥，能引蟲出，頻易取瘥。

○諸肉有毒

牛獨肝○黑牛白頭○牛馬生疔死○羊獨角○
黑羊白頭○猪羊心肝有孔○馬生角○白羊黑
頭○馬鞍下黑肉○馬肝○白馬黑頭○六畜自
死首北向○馬無夜眼○白馬青蹄○六畜自死
口不閉○獒犬肉○犬有懸蹄○六畜瘡疥疫疔
死○鹿白臆○鹿文如豹○諸畜帶龍形○獸岐
尾○諸獸赤足○諸畜肉中有米星○禽獸肝青
○獸中毒箭死○脯沾屋漏○米甕中肉脯○六
畜肉熱血不斷○祭肉自動○諸肉經宿未煮○

脯曝不燥。生肉不斂水。六畜肉得鹹酢不變色。肉熟不斂水。肉煮不熟。六畜肉墮地不沾塵。肉落水浮。肉汁器盛閉氣。六畜肉與犬犬不食者。已上竝不可食殺人病人令人生癰腫疔毒。

諸心損心。諸腦損陽滑精。諸肝損肝。六畜脾一生不可食。諸血損血敗陽。經夏臭脯痿人陰成水病。魚餒肉敗。諸脂燃燈損目。本生命肉令人神魂不安。春不食肝。夏不食心。

○秋不食肺。○冬不食腎。○四季不食脾。

○解諸肉毒

中六畜肉毒

六畜乾屎末。伏龍肝末。黃蘗末。赤小豆燒末。竝可解之。

馬肉

毒

蘆根汁。甘草汁。嚼杏仁。飲美酒。竝可解之。

馬肝毒

豬骨灰。牡鼠屎。豆豉。

俱水服。竝可解之。

牛馬生疔死肉毒

澤蘭根。生薑水。生薑。

蒲播酒。甘草根。播水。甘草煎湯。服竝可解之。

牛肉毒

豬脂化湯飲。甘草湯。豬牙。

灰水服。竝可解之。

獨肝牛毒

服人乳。解之。

△右諸獸肉有毒非一。或形色異常。或烹調失飪。尼父已垂不食之戒。又肉雖多。不使勝食氣。蓋人食

以穀爲主。一或過焉。適遭其害。非養生之道也。况
望其有所補益乎。夫人雖非孔子之聖。而昧於飲
食之節。以自戕其生。何太愚耶。宜合禽類後之說
觀之。則庶乎其不差矣。

